

四庫全書

集部

欽定四庫全書

集部

忠肅集卷六

詳校官編修_臣翟槐

中書_臣劉源溥覆勘

總校官檢討_臣何思鈞

校對官中書_臣李巖

謄錄監生_臣黃嵩齡

欽定四庫全書

忠肅集卷六

明于謙撰

雜行類

兵部為來歸人馬事兵科抄出提督軍務都察院右僉
都御史鄒來學題准兵部咨該提督遼東軍務左都御史
王翱題據遼東都司呈本司地方章驛站烟墩走回迤
北男子三名差人送到廣寧委官審得蘇克等供說
境外額森事情掌部事少保兼本部尚書于謙等欽奉

聖旨兵部知道欽此欽遵抄出到部叅照各人傳說北中
前項事情雖係一面之詞未見的實然近來迤北走回
人口同來降外部亦往往備述其事但未見傳說托克托
布哈王有無見在今稱被哈巴爾王殺了人馬跟額森二
處去等因臣等切詳額森倚恃尤強違天悖德罪大惡
極凌邁古今一旦無故將托克托布哈殺害雖傳聞之語
未可憑信萬一果如蘓克等所言則額森既將托克托布
哈人馬吞併其部落氣勢不無益加強盛志驕氣盈愈

無顧忌又况額森桀驁險狠敢為不義已將本主殺逆
自知惡不可掩罪不可逃雖欲改悔其道無由迺雖遣
使朝貢姦謀未易窺測誠恐漸有圖大之意復萌犯邊
之謀故意遣使來京一則張大殺敗托克托布哈一則使
我懈怠不為設備雖天地鬼神不容而有必敗之理然
抄掠蹂躪之暴不可不為隄備竊慮今年夏秋之間分
遣彼衆在邊剽掠不無邊事日急臨期難以措置兼大
同係西北重鎮為山西及鴈門紫荆倒馬等關一帶藩

籬而遼東永平山海宣府延綏寧夏甘肅俱係緊急邊境去處雖是節有議奏行去各該總兵鎮守等官隄備事理誠恐視為泛常彼此因循日月卒遇緊急敵情不能相機守戰設若一處不支而稍挫鋒銳未免諸處聞風而遞相動搖況安邊之道以先戒為寶而防患之策以預備為先近日遼東及偏頭關等處節奏瞭見敵營火發數多往南行走不可不備合無令該府差人馳驛齎文與遼東永平山海宣府大同延綏寧夏總兵鎮守

守備等項文武內外官員從長計議倘或外敵額森等
搖動扇惑侵擾邊方設何計策可以阻截勦殺不令深
入用何方畧可以保固邊境俾無疎虞所在領軍頭目
何人堪以出戰何人堪以守城何城軍馬數少堪以增
添何處軍馬太多堪以那調沿邊一帶墩臺中間有無
堪以添設所在糧餉草束有無收積堪勾支用逐一區
畫停當具實回奏定奪等因具題奉聖旨是欽此欽遵
備咨到院臣竊照敵首額森遠居沙漠藏伏一隅向者

恃一時之微倖來犯京師而還已出於平日之望外今
又謀害本主凌虐同類雖曰傳言不足盡信然豺虎無
厭理或有之使其終不知止再敢侵犯邊鄙是自罹敗
亡之禍以我之逸待彼之勞以我之險阨彼之危取勝
之道何有哉臣深荷天恩叨承重寄不諳軍旅素無克
敵制勝之才從事邊方謹陳設險守備之畧未知可否
伏乞聖裁緣係具實回奏事理今將永平山海直抵密
雲一帶邊情開坐具題該通政使司官奏奉聖旨兵部

看欽此欽遵抄出到部今將所言事件議擬開立前件
謹題請旨

計開

一永平山海薊州等處地方會同鎮守右少監郁
永總兵官都督僉事宗勝叅將胡鏞馬榮計議得
自山海至猪圈頭止沿途路經一千二百餘里新
舊營堡三十四處每營分委指揮一員管束每二
三營或四五營選把總指揮一員提督數內揀選

精銳勇敢之人屯聚四處曰駐操營無事之時不
守關隘分為一等二等專一操練有警之際某營
策應某關俱照平日定擬成規不致推託又選揀
輕健善能遠走便於藏伏素知地理者聚為一營
專聽截殺劫營緊急調用原設并新增大小關寨
一百一十七處每關修砌執牆關外又重立關馬
石牆深挑溝塹整理簽榨廣置掛木自關至二三
十里之外陟峻狹隘兩傍俱積木石其有總路險

要處所又行重別設備一則可以為關外之藩屏
一則可以遏外敵之歸路沿邊一帶地方除十分
陡峻全不通人者不必用工其餘平漫并崎嶇頗
容往來處所通削偏坡雖有高低頑石亦必用火
燒煨砍成牆壁間有深渠小口難以披削者則用
灰石砌塞大關用指揮一員小關用千戶等官一
員職專守把另選把總指揮人員分投提督有事
則守信地無事則輪流燒造執灰增添防備新舊

墩臺五百二十座前後聯絡烽火相望關外至五
十里止各有接連架砲士卒五十里之外至百里
止又有長哨夜不收推選熟知地理官員不時往
來點視自營而至關自關而至外平居之日各司
其事卒遇邊警會而為一又必累行踏勘籌度外
敵何路而來何路而去來則何以禦之去則何以
邀之此平昔設法之方大槩如此使其外敵小至
誠恐聲東擊西分兵誘我乘隙而入各該關營照

舊操守不必調遣止調原定策應營堡官軍協同
本關相機勦殺大至則通調見有官軍俱各赴受
敵處所左右屯駐臣與總兵躬親當其前分調叅
將挑選精健士卒從間出關控據險隘之所以遏
其後驍勇頭目又各分兵埋伏乘機而動我之兵
力雖寡有險可恃彼之人馬雖暴無計可施使其
進無所得退無所歸蛇豕雖毒已投於陷阱幾何
而不至於覆亡也哉然兵家情狀變態不一倘彼

有兵相繼設伏以餌我無可為之機無可乘之勢
則當整慎勿戰固守要害不可輕動以墮其計彼
之人馬乏食漸至罷弊必不能持久而自退矣我
則萬無一失何邊患之足慮哉看得管軍頭目總
兵叅將而下皆可隨機應用把總提調營堡指揮
李濟等十員頗有驍勇堪以出戰把總提調關隘
指揮陳宣等八員處事勤慎堪以守關都指揮僉
事劉輔等僅可以固守山海永平薊州遵化等

處城池其關營軍馬沿邊墩臺等項俱已區畫增
那停當各處倉驛糧草見勾支用前件省得所奏
係干邊務既已鄒來學會同彼處總兵鎮守等官
都督僉事宗勝等計議停當俱合准擬仍行鄒來
學等照依所處事理逐一施行務在提督有方用
求實效不許虛應故事徒為文具仍嚴加禁約各
該關隘把總都指揮等官將所部士卒加意撫恤
訓練聽候調用毋得假公營私役占虐害以致軍

令不行士心不附遇警不能守戰致誤事機

一密雲地方會同鎮守內官張溥協贊軍務監察御史張斌鎮守都指揮同知趙玟署都指揮僉事張興計議得東自黃河口起至西墓田峪止路經八百餘里關寨七十四處墩臺一百五十六座營堡八所操守官軍舍餘四千八百一十六員名沿邊一帶平漫去處俱已修削偏坡關口修砌堅厚牆城關外重置闌馬石牆挑掘壕塹廣置簽柵又有

軍民夜不收輪流架砲出哨關內營堡官軍常川
操習聽候調遣無事之時都指揮趙玟分管古北
口迤東署都指揮僉事張興分管古北口迤西內
官張溥御史張斌鎮守古北口通行提督密雲中
後二衛古北東西二路軍馬如有聲息敵少各照
地方調用附近營堡之人策應敵衆通調東西二
路官軍於受敵處所駐劄可守則堅壁清野控據
要害分布官軍翼其兩哨奪其高峯使之勇無所施

衆無所用人馬罷敝將不戰而自退矣可戰則鎮
守內外協贊官員躬率士卒以禦其衝突密切選
委驍勇頭目帶領精銳官軍潛伏險隘以遏其歸
路挑選勇敢之夫長戟巨斧火器短兵強弓勁弩
齊力奮勇或晝而摧其堅陣或夜而襲其營壘臣
等之經營圖畫設險守備不過如此切詳都指揮
趙玟等固可以領軍出戰指揮劉榮毛顯亦可以
守城緣要害數多兵力寡少有一闕官軍止十餘

名者少則五七名者平居之時畫地分守尚且不
敷遇警之際將何調用有如古北口潮河川并龍
王峪五寨俱各寬漫平坦路通大小興州沙漠敵
帳可容千萬人馬往來牆子嶺輓柴子四馬等關
俱係曾經外敵侵逼之處雖有貼守海運之人全
無器械武事生疎不過因循月日懸望輪班而已
倘有遣調豈得實用今照石匣驛正係東西地里
適均之處水旱利便可以照依永平山海等處建

立駐操營一所乞勅該部計議取回海運官軍免致徒費糧賞將密雲中衛并附近營州前營州左興州後等衛在京操備官軍摘撥二千員名選委驍勇都指揮一員管領前來常川駐劄使其住成家業不必輪班專一操練聽候策應仍聽內官張溥協贊監察御史張斌節制如此庶使首尾相連緩急得用其邊備之謹嚴可以與永平山海等處同一無虞矣倘臣言為無足取直待報有聲息臨期奏

請定奪雖調京軍前來必須往復固守一時應援
不及貽患非輕再照本處見在馬草頗勾支用倉
糧數少已經具題外乞勅該部急為處置便益前
件看得密雲中衛并營州左興州後等衛在京官
軍係比先年間選取赴京操備之數即目多已揀
作團營操練聽候警急出口破敵而彼中事體比
之各邊及京師頗緩難准撥去守備又前項撥去
海運官軍比先原有此故京保暫時增添候邊事

寧息亦當取回況差撥前去已久操習有成且在
京各營亦有此等淮安等處退下運糧官軍有等
操練既久弓馬熟閑多有選作團營頭撥之數豈
可盡謂徒費糧儲所據前項官軍亦難取回況非
無勇怯之分法有激勵之道若所在鎮守等官能
將前項軍士設法訓練用心撫恤自然衆心歸附
武藝精熟則軍威必致於整肅武事豈終於生疎
合行鄒來學等仍將前項發去相兼彼處原有官

軍如法團營操練守禦地方不許親營官旗私役
虐害以致衆情不附遇警僨事其奏倉糧數少一
節合行戶部徑自查照定奪景泰三年四月十六
日奉聖旨是欽此

兵部為整點軍伍等事兵科抄出守備紫荆關左軍都
督府右都督陶瑾題節該欽奉勅諭今特命爾往紫荆
關代都督同知顧興祖守備本關并所屬一帶口子凡
有牆垣修築未堅厚者加意修築壕塹挑掘未深濶者

加意挑掘但係漫山可通人馬之處皆須親自逐一踏勘斬截砍削令其陡峻照依地方修築墩臺垣堡分撥官軍常川操守哨瞭以防不虞如遇外敵侵逼或分兵拒敵或合衆勦殺不許頃刻怠忽有誤事機欽此除欽遵外臣今將點看得本關并黃土嶺等口守備官軍不便等項事件開坐具本該通政使司官奏奉聖旨兵部知道欽此欽遵抄出到部除軍器并軍人口糧二件行移工部等部另行外今將所言整點軍伍等事逐一議

擬開立前件謹題請旨

計開

一件整理軍伍事臣點看得本關并各口守備圍
子手伍軍等營并大寧都司官軍除放班事故
外見在官軍九千七百一十三員名內揀選得精
銳五千六百二十五員名次撥官軍四千八十八
員名今已編隊伍操備竊緣前項官軍皆係守
禦緊要關口預備戰守之數今次撥數多倘遇警

急恐誤調用已將前項官軍數目開單行移兵部
外如蒙乞勅該部轉行都督衛穎圍子手坐營都
督過興等如遇換班之時將各營點選精銳官軍
前來更換及行五軍所管山東河南大寧等都司
及南北直隸衛所如遇放班回衛之日務要點選精
壯軍士充替前來庶不虛費糧賞而守邊得用矣
前件合候陶瑾開到前項官軍數目行移該營定
奪不許指此為由將團營及頭撥官軍動撥致誤緊

關調用仍通行山東等都司南北直隸衛所如遇
紫荆關官軍放班回還其不堪之數務要選揀之人
充替前去操守亦不許將堪中軍士聽囑存留及
將軟弱不堪一槩轉數事發重治以罪

一件缺官守備事臣看得紫荆關西北浮圖峪盤
石等八口已有指揮千百戶等官及今差都指揮
汪禮等并東北右龍安馬水等一十一口見委都指
揮左能及指揮等官在彼分投操守今看得西南

黃土嶺常家溝等口一十二處正東乾河官坐嶺
等屯口處共一十九處雖有指揮一員千百戶八
員俱無老成之人有一人守二三處者況山多崎
險萬一遇警實難來往看管及照本關地方俱係
大寧都司所管如蒙乞勅該部將大寧都司見在
都指揮內添調都指揮二員指揮二員千百戶一
十一員前來分於前項東西黃土嶺乾河等口操
備遇警調用便益前件看得黃土嶺常家溝等口

已有指揮千百戶八員守備若再添委都指揮等
官非惟卒無相應抑且官多人擾兼大寧都司屬
衛除京操等項差占外見在官數不多難再差遣
合行陶瑾公同大理寺卿孔文瑛等徑自計議查
照前項隘口守備官員俱無老成之人宜從於本
關見有軍職內選揀的當官員前去充換往來守
禦務俾軍士有所鈐束地方不致疎虞

一件逃故官軍事臣點看得五軍神機等營原撥

來關守備官軍數內鄒敬等九百六十七員名自
景泰元年二年三年月日不等陸續在逃為事病
故等項去訖及查得卷內已經節題挨拿送問撥補
去後至今未蒙發到今照官軍鄒敬等俱係兵部
奏准撥來守備邊關人數即目口外屢報聲息缺
人調用除責據各營把總指揮董林等將前項在
逃事故官軍花名衛所查勘明白開單行移兵部
外如蒙乞勅該部轉行各營先將前項逃故官軍

照數作急撥補前來守備仍着落各該都司衛所
將在逃官軍鄒敬等照名挨拿送法司究問以警
見在官軍庶使邊關得人應用不致誤事便益前
件看得前項軍士俱係在京各營撥去守禦之數
設有事故合當行移原衛所挨拿撥補今若要於
在京先行撥補非惟卒無相應堪以撥補尤恐奸
頑倣倣互相逃避衛所因見撥有替換未免因循
怠忽不行着實挨究選撥奸頑愈加廢弛合候開

到前項事故官軍行移都察院轉行各該巡按監察御史著落各該都司衛所挨拿得獲問擬明白管解赴院詳審照例發落若有原先病故老弱等項軍士應合撥補者令巡按御史嚴督該衛依數挨究精壯者解來補替不許占怯致誤邊務緣數內指揮鄒敬等係軍職未敢擅便景泰三年四月十六日奉聖旨是欽此

兵部為邊患等事兵科抄出貴州布政司思南府蠻夷

長官司土官長官安逸奏伏覩大明律內一款若內外
大小官員但有本衙門不便事件許令明白條陳實封
進呈取自上裁若知而不言苟延歲月者在內從監察
御史在外從按察司糾察欽此欽遵臣任土官不敢緘
默合將本處地方不便事件逐一開坐具本親齎伏望
皇上體祖宗之成憲憫邊境之生靈仍命內外廷臣
斷以至公早為救濟庶幾邊患可息軍民可安臣一介
草茅罪當萬死下情不勝惶汗之至具本該通政使司

官奏奉聖旨該衙門知道欽此欽遵抄出到部今將所奏事件逐一議擬開立前件謹題請旨

計開五件

一件安邊事有鎮遠府邛水一十五洞蠻夷長官司十四寨反叛苗人原係前思州田宣慰親管永樂十年內本官調領各寨苗人攻破思南地方後改府治將前長官司撥隸新設鎮遠府其性兇惡得肆奸謀畧蒙總兵官都督梁福等貴州左布政

使蔣廷瓚擬調官軍勦滅豈期鎮遠州土官同知
楊政麟妄意招撫總兵官信其惑亂不曾征勦連
年滋蔓宣德年間有湖廣都指揮何貴往來備禦
見得縱橫奮勇生擒賊徒斬首抽腸是以地方寧
靖本官與按察使應履平和被其排奏革去自
此守鎮不嚴乃於前歲糾合播州宣慰司草塘貴
州平越等衛先苗出境謀殺軍民放火燒破大小
衙門經今三年未曾寧息苗賊聞知大軍數多面

從心異雖是靖遠伯王驥招撫不過一月又將石
阡思南二府人民重復殺虜逃命者至今招撫不
回藏山者缺食餓死苗賊不時猖獗若非添撥大
軍討滅終被侵害乞勅兵部定奪調遣江南都司
衛所軍馬湖廣江西四川雲南四布政司民壯兼
同各處宣慰宣撫安撫招討長官司勇猛蠻軍土
兵土軍通行總督軍務都御史總兵等官調度將
前項為惡尤苗盡行勦滅勿聽招撫仍於四川播

州宣慰司照舊除授軍職副使僉事協同土官
宣慰撫治其湖廣貴州邊衛分撥總兵叅將守
鎮如此則地方可寧矣前件看得貴州地方先
因苗賊生發欽命總督總兵等官右都御史王
來等統領官軍在彼撫捕近因各賊未平已
經節奏行王來等作急設法處置今奏要添調
江南官軍民壯將允苗盡行勦滅勿聽招撫一節
緣王來等處已有調到雲南四川二都司官軍兼

同本處原有官軍守戰又況近日湖廣貴州等處俱有盜賊擾攘各用官軍撫捕別無相應堪以起調兼且區畫賊情撫捕殺戮二者相須為用若專於殺戮不聽撫捕非惟賊類數多不可勝誅抑恐鋒刃所及橫罹無辜合行王來等務在整擻官軍人等將前項苗賊上緊設策撫捕其間若有悔過遷善誠于納降者則開以更生之路使之復業怙惡不悛終於反覆者則振以官兵之威俾其授首既不

許一於招撫縱賊長奸亦不許果於殺戮濫及無辜必須處置合宜而患害蠲除地方寧謐而經久利便仍將撫捕賊寇盡絕緣由具實回奏其稱要於播州宣慰司除授軍職副使僉事協同土官宣慰撫治查無事例難准又況各處土官衙門已有都布按三司官員分巡整治難再濫設及稱湖廣貴州邊衛要分撥總兵叅將查得湖廣邊境已有都督陳友等守備貴州邊境已有都指揮張任守

備兩處總兵叅將又有保定伯梁瑤都督方瑛都指揮安順等難再差遣重為地方之擾

一件戶口糧馬事照得本長官司原管夷民四里內有三里人戶俱被各處苗賊殺虜零落不存雖有避命巖崖藏住又遭疫疾死亡少有復業干礙糧馬無人應當臣竊思本府所屬五長官司一縣戶口多有隱瞞漏報秋糧驛馬高下不均以致遞年差役靠損貧民比先開設府治止憑黃冊朦朧

僉點官府不曾稽考中間里分多而糧馬少戶口
增而差役輕今被苗賊殺虜卷冊燒毀兩無查照
難以分辨若不從長編造不無富者愈富貧者愈
貧殃及小民深為未便乞勅戶兵二部照清軍事
例各遣主事二員會同布政司官員親詣各長官
司縣不分殺虜與見在人戶從實取勘見丁編冊
量力多寡注定糧差驛馬攢造黃冊備照及將消
乏圖里照例歸併其死絕戶下糧馬明白開除以

甦民困敢有隱瞞詐冒合戶者官吏里老依律取
問仍行思州等五府各長官司一體均平造報非
惟不負朝廷愛養邊方之意抑且糧差無拖欠矣
前件省得奏要差主事攢造馬冊緣彼處自有三
司等官理辦難再差官其要將死絕戶下馬匹開
除緣彼係是極邊地方又兼屢經擾攘宜從寬緩
令貴州布政司委官查勘明白徑自分豁所據攢
造黃冊合行戶部徑自查照定奪

一件舉用賢才事有叅贊軍務貴州按察司副使
李睿先蒙坐委經理屯田守鎮蠻夷詢察官員賢
否任用以來民安事妥不期前歲貴州等處諸種
苗蠻作耗攻圍城池被其久困本官忠義勇敢日
夜運謀効力死守衆皆推服功莫大焉又有貴州
平越衛千戶趙信武藝精通弓馬慣熟抑且苗蠻
畏服不敢出沒本官為事去後苗賊乘機出境劫
殺官民竊思趙信平昔播州草塘貴州平越等處

完苗聞其威勢稱號老虎似此軍職百無一二實堪任用以上文武賢才二員乞勅吏兵二部再加陞擢專一提督貴州四川湖廣有苗地方節制軍務候賊寧息仍令守鎮便益前件除要陞擢副使李睿行移吏部另行外查得近該總督軍務右都御史王來奏保平越衛指揮同知趙信素負敢勇苗蠻稱為老虎要量授署都指揮僉事守備興隆等衛地方等因本部已經奏准趙信量陞署都指

揮僉事守備興隆去後今奏要陞擢平越衛千戶趙
信一節未審本官即係王來所保趙信惟復別有
姓名相同之人緣職事不同難以定奪合行王來
查照若趙信即係先前奏保署都指揮行令本官
照舊守備若係別項官員就便體勘本官有無前
項才能應否陞擢明白具由回奏以憑施行

一件官制事臣本長官司官制蠻夷二字係正六
品印信衙門正統十四年被鎮遠府印水草塘等

處蠻夷出劫搜山將臣堂弟安達殺死罵說他是
蠻夷長官司百姓與我一般不肯同反殺了無事
又將漏溪等圖人民殺虜罵說若是別箇長官司
百姓少殺他臣思始祖陝西人氏前元時輔討
西蜀堯平古州八萬地方有功卜地義陽住坐生
下兒男洪武年間舉任長官職事子孫承襲以來
宣布朝廷威德土民向化年久今被別郡苗蠻謀
反上欺國法下侮官制因而殺死堂弟情理不甘

乞勅禮部定奪合無不拘舊額將蠻夷官制改賜
義陽長官司請降印信令臣齎回行使不惟用夏
變夷抑且永霑聖化便益前件省得思南府蠻夷
長官司衙門係比先年間設置已定今要將蠻夷
官制改作義陽長官司另降印信誠恐有違舊制
又況蠻夷長官衙門貴州見有二十餘處要將一
處更改不無諸處倣倣非惟事體紛更抑且成規
紊亂所奏難准

一件撫安地方事臣思貴州左布政使蔣廷瓚
臚奏准將湖廣布政司舊管思州思南五宣慰司
地方分設八府比較腹裏不滿一縣人民又摘出
四川布政司舊管貴州宣慰司并軍民衛分土官
衙門却與貴州開設布按三司並不係蔣廷瓚征
勦化外克平郡置實乃人民稀少不敢重複干冒
近者貴州普定都勻清平平越等處并四川播州
宣慰司草塘黃平重安苗賊糾合鎮遠衛府所屬

諸種苗蠻自正統十四年以來造反劫殺軍民受
害不計其數止有思南石阡銅仁三府之民中間
雖有苗類不敢為惡反被前項衛府宣慰不行鈴
束撫捕縱令毒害生靈臣先於正統九年間曾將
六府民情應合歸併緣由奏聞奉吏部勘合行移
貴州三司體勘不期前巡按監察御史虞禎偏執
不由都按二司公論止憑布政易節私議妄行回
報致有今日之患比先二宣慰司所管貧薄夷民

自洪武永樂年間湖廣管屬之時止是秋糧驛馬
餘無阜隸月糧是以蠻民守法無事雖二宣慰爭
占於民並無相干今照貴州自添設三司以來遞
年拜進表箋朝覲公差丁憂任滿等項下至龍里
鎮遠一帶衝要衛府雖稱軍民官制中間民庶生熟
不同刀耕火種別無生理所辦雜泛科差只得典
賣兒女田產奉承不暇每遇雲南貴州往來官員
或舉家回還原籍扛擡浩繁苦楚尤甚因此激變

致生邊患荷蒙聖恩命將出師費用糧賞將及三
年未得平安在京大臣有欲革併照舊奈何中間
又有羅織裁減官員終為不便臣叨任土官豈容
坐視竊思貴州城池原立都司總兵鎮守附郭止
有貴州長官司里長五名方面難為况六府官民
逆上貴州山路陡險不通舟楫肩擔背負民力艱
辛謹按貴州古為思方之邊思州六府近湖廣辰
沅之一隅乞勅吏兵二部都察院考古再行計議

仍將思州六府官民歸併撥還湖廣布政司管轄
一水便利以紓民困其貴州宣慰司并軍民衛分
土官衙門仍隸四川布政司照舊提督如此則科
差減省軍民安妥矣前件查得先該吏部左侍郎
何文淵題稱要將貴州被賊燒毀衙門勿復起蓋
布按二司并各府大小官吏并從征官軍俱各取
回止照洪武年間設立宣慰司衙門管屬土人設
都司衙門鈐束軍衛等因具題抄出到部為照貴

州地方係我太祖高皇帝開創於前太宗文皇帝經營於後殆今八十餘年近因征南之師數出遂致各種苗蠻乘機生發各該城池雖被苗賊圍困各城官員皆能効力死守況總督總兵叅將巡按三司等官又不曾要將貴州地方遺棄征進官軍取回緣由具奏係干邊務難以遙度已行奏准行令彼處總兵等官保定伯梁瑤等將何文淵所言公同勘議處置務要上不違祖宗之成法下不貽

邊境之後患通行回奏定奪續據貴州銅仁府烏羅長官司土官長官楊敏等奏稱本處八府土官衙門永樂年間開設貴州布按二司除授流官僉點承差皂隸等項辦納月錢擾害非止一端以至正統十四年賊寇生發人民被害要照洪武年間將本處地方原係四川所轄者撥付四川原係湖廣所轄者撥付湖廣等因具奏抄出本部查照何文淵所奏事理又經覆奏通行梁瑤王來等計議

處置俱各未報今奏又要將思州六府歸併湖廣
管轄其貴州宣慰司并軍民衛分土官衙門隸四
川提督一節緣無王來等回奏緣由係干邊方重
事難便定奪合無再行王來梁瑤公同副總兵方
瑛及四川都布按三司巡按監察御史查照原今
所奏應否改隸務在會同勘議斟酌停當上有益
於朝廷下有便於民庶作急具由回奏不許輕易
怠忽致貽後患及日久不即剖決多致各該土官

展轉具奏事無結絕景泰三年四月二十二日奉
聖旨是欽此

兵部為撫安等事禮科抄出貴州布政司思南府蠻夷
長官司土官長官安逸奏今將本處地方軍民不便事
件具本開坐伏望聖恩憐憫殘生毒害之苦勅內外廷
臣早為救濟免用三司體勘如此則軍民有益臣一介
草茅罪當萬死下情不勝惶汗之至具本該通政使司
官奏奉聖旨該衙門看欽此欽遵抄出到部今將所奏

事件開立前件謹題請旨

計開

一件糧馬事今照本長官司正統十四年景泰元年糧課奏奉勘合着落布按二司巡按御史體實除免外所有景泰二年三年糧課仍被播州草塘西烟青池苗賊不時劫殺其在山殘民並需佈種又被秋雨浸爛少得收成有等星散夷民盡丁守把各處關隘缺食者多俱採草糧救命本身糧課

無從徵納臣於去冬起程間遇有飛報湖廣鎮遠
衛所部苗賊糾結鎮遠府已招撫十四寨反賊出
焦溪大路劫掠糧船又有播州草場黃平重安苗
賊串同偏橋等衛司白洗寨苗賊聲言再有三四
年劫殺各處復業軍民聞風俱又奔散荷蒙聖恩
命將討滅費用糧賞經今四年之上不得寧息已
勅戶兵二部大臣議擬將貴州布政司思州鎮遠
石阡思南銅仁五府被賊殺敗各長官司拖欠景

泰二年三年一應糧課并原額馬驛鋪陳什物廩
給等件再行停免以安夷人反側之心庶不激變
逃竄仍乞添遣巡撫湖廣都御史李實親詣前項
接連地方督察各該總兵設法撫捕再不平靖查
提親管三品以下軍衛指揮宣慰土官依律降罷
賞罰明信不惟邊方生靈寧安抑且腹裏軍民皆
休息矣前件除要停免景泰二年三年拖欠一應
糧課戶部另行外查得先該總兵官兵部尚書靖

遠伯王驥題稱貴州赤水畢節等處驛站舖舍俱被苗蠻燒毀走遯馬匹鋪陳什物搶劫殆盡要令因人自備馬匹送驛走遯并令該管官司設法補置鋪陳什物等因具題抄出本部已經依議奏准通行去後今奏又要停免一節緣即目貴州地方苗賊未寧凡遇緊急聲息必須差人馳報若便一槩停免誠恐有誤邊務又查得近該安逸奏要將死絕戶下馬匹開除本部為照彼處係極邊地方

累經擾攘合從寬緩又經奏准行移貴州布政司
徑自分豁外所據鋪陳什物合無再行貴州布政司
從長勘議前項土官衙門驛站鋪陳什物如果夷
情艱難應合將景泰二年三年原額之數暫且停
免宜從分豁若有違礙難便寬減恐誤軍務仍要照
舊亦要斟酌緩急整理毋得逼迫人難其奏要添
遣巡撫湖廣都御史李實督察各該總兵設法撫
捕再不平靖查提親管三品以下軍衛指揮宣慰

土官依律降罷一節緣貴州見有右都御史王來
巡撫兼總督軍務湖廣地方廣濶難將李實添遣
又況提問軍職并土官宣慰必須奏請不許專擅
此係舊制難准紛更合無行移王來將貴州一帶
苗賊務在躬親提督官軍設法撫捕日下盡絕具
實回奏果有領軍頭目退縮誤事干犯軍法情罪
輕者量為處置情罪重者具奏定奪務俾賊寇
殄除而地方得以安妥賞罰明信而將士力於

事功不許苟且耽延以致長姦玩寇亦不許任情用法因而事有激變景泰二年四月二十五日奉聖旨是欽此

兵部為軍務事兵科抄出總督邊儲叅贊軍務都察院右僉都御史李秉題臣聞軍士有強弱者必先於慎揀選軍職有賢否者必在乎公進退竊照宣府等處團操軍士中間有身體雖壯膽氣怯弱弓馬生疎者有身雖矮小而膽氣雄壯弓馬熟閑者此等之人把總

管隊官員深知其詳遇警出戰必先揀選其把總管隊官必公其議論第其優劣某軍有勇而弓馬熟閑某軍無勇而弓馬生疎非有私情不敢苟且為其生死同致其憂也成敗同任其責也關係甚重各不敢輕查得宣府見操軍士先該提督軍務工部尚書石璞選其精壯者一萬一千餘名定為頭撥每名月加米一斗其餘定為次撥三撥照舊支給月糧八斗近該臣奏要左右叅將楊能楊信各帶官軍一千員名協同馬營等

處官軍修理邊備其叅將楊能說稱尚書比時挑選軍士止是出於已見不曾詢問下人一時挑選不精因而各隊軍士強弱不一如今過口恐有緊急聲息須用合兵勦殺外敵當興鎮守等官栢玉公同管隊官員選揀身力精壯弓馬閑熟軍士一千餘名其所選堪中軍士次撥者多頭撥者少甚至又有領馬軍人馬堪與戰人無鬪志者將好馬搭配選中軍士暫且過口候回還俱入各隊混同操練臣看得不堪過口軍人名為頭撥

食糧雖多而實怯懦選中過口軍人名非頭撥食糧雖少其實精銳不惟人心多不肯平誠恐遇警不得實用當與總兵官紀廣計議要將見操軍士重別揀選精壯弓馬熟閑者定為頭撥遇有緊急當先殺敵其餘定為次撥三撥分兵應援都督紀廣惟推頭撥官軍規矩已定曾經具奏不可更改臣竊詳論無當否合輿情者為確論法無定在協公道者為良法為總兵者自合廣詢衆論俯順下情務使見操官軍強弱不至於混淆

勇怯不雜於並進庶幾人馬相得兵將相識倘有警急庶克有濟今都督紀廣不恤人言偏執已見掌兵柄如兒戲視邊備若等閒操練無法紀律不嚴人心愈見其懈怠兵政日覺其廢弛似此因循故常遇警豈能成事再照各城堡見操把總都指揮等官多有年力衰憊之人素無膽畧濫分兵權況即今邊報不絕人心未安挑選官軍尤為急務若不早為處置誠恐有誤大計臣職居言路不敢緘默乞勅兵部從長計議合無令臣公

同各處鎮守等官着落把總管隊官將見操軍士挑選身力少壯弓馬熟閑定為頭撥其餘定為次撥三撥各另編成隊伍如頭撥軍士馬足矮小者就於三撥好馬內對換騎操其管操把總都指揮等官內有年力衰憊無謀無勇及曾經告發剝削害軍等項官員就便黜退令其隨操或守城管事另選有謀有勇官員專委把總管隊常川操習以防調度仍將挑選過官軍數目明白開奏如此則官員知所勸戒遇敵可圖成功緣係挑

選操練官軍事理具題該通政使司官奏奉聖旨兵部知道欽此欽遵抄出到部臣等竊詳禦侮之道莫先於練兵練兵之要必分其強弱故兵法曰兵無選鋒曰北又曰兵以治為勝百萬之衆不用命不如萬人之鬪不如百人之奮此言兵不貴多貴乎精多而不精莫若少而精之為愈也竊照宣府地方正係控制邊境拱衛京師要害去處達輶不時出沒侵擾而迤北差遣使臣朝貢往來於此經過正宜簡練士卒整肅兵威以捍禦敵

騎鞏固藩籬以防不測之虞以為經久之計豈期總兵
官右都督紀廣不思朝廷委任之隆地方付託之重賊
情之奸詐難測軍務之關繫甚大止知利身利家並不
為公為國凡事因循苟且以致軍士強弱混淆而無簡
練之法人心弛懈自肆而無鼓舞之方無事則苟延歲
月有事則倉惶失措庸常怯懦之名彰彰在人耳目而
李秉職任風紀委以叅贊當邊方多事之秋值敵情不
測之日因見宣府各城官軍簡練不精建議要公同

各官重複揀選此實整飭邊備振肅兵威安邊禦侮長
策為紀廣者當協心比志和同計議而行却乃不恤人
言偏執已見以因循為得計視邊務如尋常執稱規矩
已定不肯採納輿情推原本心不過將各衛所精壯軍
士私役在己或辦納月錢或種田覓利懼怕盡數選出
以失私役以此不肯揀選執要混淆况揀選軍士定為
頭撥次撥三撥操練正係京師見行亦非李秉臆見若
不照依李秉與鎮守等官內官栢玉議奏事理赴此邊

報稍寧上緊揀選萬一外敵逞彼兵威仍復擾我邊境
軍士素無分別強弱混為一途未免彼此負累進止兩
難不能成功尤恐因而壞事又況馬營等處地界接連
尤宜謹慎防備簡練兵卒乃為至要合無一一准其所
奏差人馳驛齎文與李秉公同總兵鎮守等官都督紀
廣楊能楊信孫安江福及內官栢玉各該守備都指揮
等官計議設法將所部地方城池官軍人等作急躬親
選揀精壯之人定為頭撥其餘分為次撥三撥編成隊

伍如頭撥軍士馬匹矮小就於次撥好馬內對換其把
總都指揮等官內官老弱怯懦庸常害軍之徒就便黜
退隨操另選勇智善戰衆所推服管率軍士各官不許
聽從囑托互相容隱虛應故事迄無成效仍將選定撥
次備造文冊在總兵等官處收掌查照備開總數馳奏
不許仍前齟齬違違如果紀廣似前循私偏執推調耽
延不即整飭宜從李秉指實叅奏提問懲治緣係整肅
兵備及奉欽依兵部知道事理具題景泰三年五月二十

九日於奉天門奏奉聖旨是欽此

兵部為殺虜事兵科抄出左副總兵征蠻將軍都督僉
事武毅等題據廣西思恩軍民府申本府古津等村獐
民覃潘趙等各告本處獠山通感等峒原係賓州上林
縣管轄先因作耗蒙總兵官山雲統軍征勦撥與本府
管束招撫潘趙等出官向化辦納稅糧至今二十餘年
不料景泰三年三月二十二日有柳州府遷江營屬北
三等都首賊韋多烹等糾合莫往述昆忻城龍山等處

賊人一萬餘徒攻圍賓州城池打破鑲關使令徒賊韋公盤等來峒邀約潘趙等思得本府管束人民安業不肯順賊隨領各村男子前來那學堡同上林縣附近村分民人在堡拒守本月二十七日被賊攻打本峒古津那勞等八村殺死弟覃公盤等男婦三十三名擄去男婦一百九十四名水黃牛二百六十四隻燒毀禾倉等因備申及據思恩軍民府管知府事岑瑛備頭目韋珣呈本年三月初九日一更被賊首韋公催等三百餘徒

攻入八遷堡前門殺傷軍人陸隊等七名將公解營房串樓倉糧米燒毀等因又據慶遠府申承奉掌府事石叅政楊禧劄付今照本府宜山縣作耗蠻夷不服思恩府管屬挾讐殺害良民其土官管知府事岑瑛已將作耗地方退還宜山縣帶領甲軍盡行回還將八遷堡自行放火燒毀等因又准右叅將都指揮同知孫麒咨據指揮李玉報景泰三年四月十二日緝有賊人一千餘徒聲言攻打穿山堡報讐為是軍少掣出被賊燒毀

本堡驛站巡司賊往象州西鄉攻打自村本櫃大黃等村轉往絡更等因臣會同欽差巡撫廣西兼提督軍務刑部右侍郎李棠巡按廣西監察御史張瀾廣西都布按三司都指揮同知等官杜衡等計議係干賊人出沒劫殺重事查得賊人圍打賓州城池被官軍敵退已經會本具題外今該前因除行思恩軍民府知府岑瑛加意撫諭本府該管地方人民各安生業住種督領甲軍人等嚴謹哨捕本境地方遇賊出沒相機截殺及行右叅

將孫麒并慶遠府領哨都指揮彭瑛掌府事右叅政楊禧體勘莫往述昆等處賊徒如果出劫就便設法撫捕并挨追思恩軍民府被虜人牛給主及行勘是否被賊燒毀八遷堡并糧米的確另行外緣係賊情事理具題該本部官欽奉聖旨兵部知道欽此欽遵抄出到部叅照所奏前因係干賊徒聚眾攻圍村堡殺虜男婦燒毀公廨營房串樓倉糧米穀重情若不早為撲捕慮恐此賊互相扇動侵擾日久愈加滋蔓重為地方之患又况

八遷堡述昆等鄉先係宜山縣管轄後將本縣八遷等
堡與岑瑛撫治蠻人不服連年劫殺今岑瑛雖將前項
地方退還誠恐各官互相爭管而事無統紀彼此頑
而人無管束流劫地方殘害良善而賊無殄絕之時兵
無休息之日始而不能熟慮終將悔之無及今後武毅
等雖是差官體勘撫捕整治慮恐徒具虛文無有實效
曠日綿歲愈長賊計未便合無令該府差人馳驛齎文
與武毅公同侍郎李棠及都布按三司堂上官同巡按

監察御史務在從長計議設法斟酌事體將前項賊寇或調兵勦殺以絕根株或設法招撫以安衆心二者之間採其長者而行以除一方之患其體勘追究前項搶劫物件事情亦要從公處置務在夷人悅服事體便利上下相安久遠無虞具實回奏不許徇私廢公遷延推調以致賊情愈加滋蔓事體日難整飭自取重罪緣奉欽依兵部知道事理具題景泰三年六月初九日奉聖旨是欽此

兵部為邊務事兵科抄出總兵官平羌將軍右軍都督
府都督同知王敬等題准鎮守涼州右監丞福保手本
景泰三年五月十三日該陝西行都司差人伴送走回
男子谷義到涼州經過於本職處說稱我是騰驤左衛
帶管總旗被蒙古搶去因曉番語一向在於哈密忠順
王處使喚彼處見有箇和尚衆人說是國師王比先同
額森調領人馬各處廝殺又到北京一帶搶掠殺人都
是和尙主意如今見在哈密里做國師他如今差一箇

輝和爾四方面皮的人粧做回回常穿一領秃袖子塔喇布哈皮襖與了他幾匹馬假做進貢名色專來腹裏探聽事情我臨來時去甘州館驛裏關口糧見他同三箇差來的大使臣都在一處安歇據說手本到臣查得先據肅州鎮守都指揮僉事吳釗呈審得被虜放回男子谷義供係騰驤左衛帶管總旗正統十四年八月二十六日在於土木被敵搶去景泰二年七月內脫走到於哈密被一回回捉住送與忠順王家住至景泰三

年正月內聽得衛拉特人來說額森死了有忠順王的娘子哭了兩三日後有忠順王同都督托克托布哈與義同一般被搶人党小四去密說我每這里有中國一千多人都是回回每搶的也有用錢買的我要放他回去不抱怨如今先將你兩箇放去到朝廷奏了但有旨意文書來時我便都放你回去本年三月初三日將義等放了跟同使臣哈濟等前來等因已經具題及案令陝西行都司差委的當人役將谷義等伴送赴京去後今准

前因叅照谷義等彼時到於甘州止是供稱先被達剌
搶去脫走到於哈密被忠順王放回情由別無哄說有
箇國師差一輝和爾人假作哈密使臣前來探聽事情
前後語言不一中間未委虛的欲將谷義等差人趕回
甘州識認緣各處進貢使臣數多恐生驚疑如蒙乞勅
該部計議合無將谷義等再行研審如果的實候使臣
到京令其識認若是使臣數內查無前項敵人仍乞勅
該部行移臣知會令甘州管北關回回都指揮僉事等

官哈玉等於存留甘州使臣內密切訪察果有本番在此嚴加關防星馳差人具奏處置及行各該守備官員嚴督各城堡墩臺隘口埋伏哨守官軍晝夜用心隄備外緣係被虜放回人口供報敵情具題又該鎮守甘肅右少監蒙泰亦題前事該本部官俱欽奉聖旨是兵部知道欽此欽遵抄出到部查得先該王敬等題稱谷義供稱有哈密忠順王喚義等密說我這裏有中國一千多人如今放你回去但有旨意文書來我便都放回去

是義等跟隨使臣哈濟等赴京進貢審問明白案令陝西行都司將谷義差人管送赴京等因抄出本部為照谷義等原係中國之人被敵搶去在於哈密地面住過年久一旦無故哈密王疎放各人回還傳說前情俱有可疑又況哈密忠順王奸詐之徒未易窺測今雖聲言彼處見有中國人一千之上若文書來我便放他回去等語言雖如此心未可知兼且哈密既欲將人口送回則當隨進貢之人遣送前來何必要求文書然後遣放

有此逐節疑惑合無候谷義等至日令通事再行審實
果無前項異情將谷義送去親管官司查收着役仍候
哈密使臣哈濟等到京回還之日請勅令哈只等齎去
曉諭哈密忠順王謂彼處有中國一千餘人若差人盡
數送還朝廷重賞不吝汝當體念國恩毋顧望以懷二心
毋猶豫以失信義等因奏奉聖旨是欽此欽遵外今抄
前因叅照谷義既已總兵官王敬等奏稱前項語言不
一及稱哈密差一輝和爾人假作使臣前探聽事情一

節未委虛的然哈密陽雖尊事朝廷陰則結連北敵交
構往來非止一日其奸謀譎詐誠難窺測而谷義之言
展轉不一亦有可疑矧今邊務方殷邊情未定所宜謹
慎防範庶幾可保無虞合無行移通事都督僉事等官
昌英等候哈密使臣同谷義等到京照依本部前次議
奏將谷義等重覆審實仍令密切識認差來使臣數內
有無輝和爾一人在內若有此人昌英等務要識認仔
細不許聲說洩漏就使作急密切具奏以憑處置若無

前項敵人亦要回奏本部行移王敬等知會依擬令哈
玉等於存留本州使臣內體察果有本番嚴加關防及
整飭軍威使知我邊境有備以折奸謀仍差人馳奏定
奪如此庶使先發其謀免致臨期誤事緣奉欽依兵部
知道事理具題景泰三年六月十一日奉聖旨是欽此
兵部為邊務事該鎮守薊州永平山海等處尚膳監右
少監郁永題照得先該右監丞林春節該欽奉太上皇
帝勅諭今烏哈泰寧朵顏福餘三衛達子頭目譎詐多

端往往指以進貢為由頻數差人往來打聽聲息或者夾帶衛拉特托歡差來之人在內亦未可知茲者勅遣往諭三衛掌衛事大頭目知之今後掌衛事大頭目常時差人進貢悉皆優免庶免繁勞俱於冬節年節聖節大頭目欲差人進貢許差的當頭目三五員來或有緊急真實聲息不拘時月許差二三人來奏報其餘部屬小頭目人等遇時節欲來進馬不必他自己來聽其附搭頭目所差來人帶進賞賜一般給與若非時節進貢及無

緊要聲息俱免其頻數差人來往今令通曉番字序班
徐亮前來爾處職專驗其番字奏文如果大頭目遇時
節差人來進貢或不拘時月差人來奏報聲息許放入
關令人伴送來京若非時節進貢及非奏報聲息并不
係大頭目差來人員與其部屬差來頭目人等悉皆當
回庶免勞擾不許泄漏欽此除欽遵外今景泰二年五月
二十六日該泰寧等三衛都指揮格奇特穆爾等差使
臣指揮實木努等九十六員并額森處回回指揮德勒

必等二員名前來進貢臣會同提調軍務都察院右僉都御史鄒來學鎮守總兵官都督僉事宗勝議得近來外敵當肆志逞威之餘有去逆效順之舉欲將人馬當回恐阻邊人向化之心乖朝廷柔遠之意兼以傳說境外事情已示驗放入關差人伴送及具奏外臣等竊詳采顏等三衛餘孽先年勢孤鼠伏一隅不足為慮自正統十四年額森猖獗犯邊已結成一黨乘機搶掠今既隨同額森遠遁而復來本處居住顯係額森部落之數

假以進貢為名包藏禍心有未可測或自起不忠之釁而探我道路之險易或糾合額森之徒而窺我兵馬之虛實即日遼東屢被其患擾邊之計稍遂入侵之氣益驕臣等所鎮永平山海一帶相去彼營不遠履霜堅冰之戒政在今日乞勅該部計議今後遇有外敵來者除歸順及有專報警急聲息等項當即具奏許令入關其餘來非時節及無真實境外事情合無照依太上皇帝勅旨就便阻回候聖節及冬節前來進貢照例審實驗

放伴送赴京仍要多方密切差人哨瞭如或此敵勢衆
離邊竄遠必須指實具奏定奪倘若近邊屯聚意在搔
擾我有可為之勢即便調領所部軍馬出口相機設法
勦捕以弭後日之患緣係處置邊務事理具題該本部
官奉聖旨兵部知道欽此欽遵抄出到部叅照奏稱烏
梁海泰寧朵顏福餘三衛達子頭目照依比先年間勅
旨今後歸順傳報聲息許令入關其餘就便阻回候冬
年令節照例赴京一節臣等議得前項番人自祖宗以


來世受官員屏蔽我邊往來通使不絕後因在邊出沒
大出官軍征勦以此堅彼黨與之心遂懷背棄之意迺
者額森大衆侵邊皆倚此敵為前鋒鄉道自額森革心
向化遣使朝貢請和遁去而烏梁海三衛達子亦各回
還本處雖時有人馬在邊出入陰有窺伺之心未曾明
白侵擾近又節次遣使臣赴京進馬朝廷禮待如初今
若無故一旦阻絕彼必以為有異謀因懷疑貳或奔投
額森或自相糾聚侵擾邊方自貽後患兼之此輩部落

正在南北二邊之間凡我被虜之人自迤北逃回者必從此處經過平居無事之時尚且被其截虜今若拒而不納則是愈激其變萬一生心致慮阻絕道路使我人不得回還非惟失陷之人自是永無歸期抑且彼中消息從此無由知會有此窒礙理難拒絕况朝廷之馭邊陲本之以大公待之以寬恕來則不拒去則不追斯乃防奸禦侮保邊弭患長策即目京師內外百穀茂盛人民安和守有城池操有軍馬彼雖欲來探我虛實我則

示以至誠無偽或者因此知我有備益堅向化之誠若
果遽然斷絕慮恐自開邊釁且外敵奸詐固不可測而
大計所關亦不在於烏梁海三衛數人往還之間便透
漏中國消息且額森之遣使來朝中國陰謀不測比之
此輩尤甚揆之事體亦可以拒絕之乎兼措置邊務撫
柔外邊有當守經有當行權者斯時外敵額森等吞併
諸種部落正在縱橫之際而烏梁海三衛名雖遣使朝
貢實則暗受額森約束所宜行權以盡懷柔之道庶使

入侵無詞不敢輕動臣等又惟邊人之性無常所利者
貨財飲食其受制於額森未必心悅誠服不過威脅勢
迫而已朝廷待以恩信加以賞勞既得彼之歡心安知
不為我邊屏蔽臣等再三籌慮所奏難准合無行移永
平山海等處提督軍務僉都御史鄒來學總兵官都督
宗勝公同鎮守叅將內外官員嚴督一帶邊關守備官
軍晝夜謹慎防閑遇有彼使到關審問來歷明白別無
侵擾情由隨即驗放差人伴送赴京不許日久留難致

生疑惑以開邊釁其間如果彼使數多帶有器械衣甲及哨探隨後別有兵騎按伏事在不測情有可疑宜從各官設法處置相機戰守仍一面星馳差人具奏不許指此為由一槩縱令入境而失誤邊務自取重罪緣奉欽依兵部知道事理具題景泰三年六月十八日奉聖旨是欽此



忠肅集卷六

欽定四庫全書

集部
忠肅集卷七

詳校官編修_臣翟槐

中書_臣劉源溥覆勘

總校官檢討_臣何思鈞

校對官中書_臣李巖

謄錄監生_臣李元位

欽定四庫全書

忠肅集卷七

明 于謙 撰

雜行類

兵部掌部事太子少保兼本部尚書臣于謙奏爲災異
事切見自去歲以來今春時序乖和雨雪不降比者閏
正月十四日風氣凄寒甚於冬月昨於二十二日大風
晝晦光景沉伏臣竊惟災沴之來必有所自天人感召
其應不虛伏念臣質本凡庸性復偏執時遭明盛位極

人臣既居師保之官又兼六卿之職欽命總督軍務俾以振揚國威臣才器不逾於常人聲望弗協於輿論報國之心雖切而濟時之術全疎經濟之學蔑聞而輔導之職奚稱上不能寅亮天工以爲聖明之助下不能阜成兆民以底太平之休兼且素乏統馭之能弗稱總戎之任今四方多故百姓流移東南之寇盜未除西北之邊報日至戡定綜理固難其人苟臣蒙恥而冒榮其奈妨賢而愆事引咎思退分所宜然伏望皇上宸斷罷臣

職務而遣歸田里或仍臣佐職別與差遣另選賢良以
代今職庶幾上回天意下協輿論以彰皇上知人之明
以免愚臣固位之責臣不勝戰慄待罪之至伏候勅旨
兵部掌部事太子少保兼本部尚書臣于謙題爲乞恩
事欽蒙聖恩賜臣房屋居住臣粉骨碎身不能補報臣
才非經濟質本凡庸遭際聖明驟膺顯擢官資崇重方
慚無補於涓埃門地寒微何意遷居於大廈况朝廷多
事之秋非臣子安居之日加以臣比年以來染患痰疾

動輒喘急行步遲緩寓宿直房庶便朝謁雖居數椽之屋足以棲息微軀非曰矯情實以取便臣又惟臣子之於君上惟知盡其所當爲而弗計其所當得故曰爲臣死忠爲子死孝臣素無分寸之功而叨受非分之賜撫心知懼揣分何堪兼之近日以來土星犯太微上相而臣備員大臣正當貶損以禳天譴豈宜厚享以重灾愆伏望聖恩察臣愚情暫停所賜候邊務十分寧息四方俱已無虞臣另行具本奏討不勝感激俟命之至

兵部掌部事太子少保兼本部尚書臣于謙題爲陳言
事近該內官監太監陳謹題稱本監差內使管領打捕
戶於真定河間等處打捕野味魚戶於直沽海子口等
處打魚合用口糧脚力扛擡軍士人夫該衙門照例差
撥應用等因該工部官欽奉聖旨是只著本監魚捕戶
自打有時起送遞運所船隻車輛遞送前來不許勞動
攪擾軍民犯的不饒欽此欽遵行移應付臣有以見皇
上愛養人力而不欲勞擾軍民之盛心矣但真定河間

并直沽等處遭寇賊擾攘之餘正人心未定之際而所
在軍民流移公私匱乏屢蒙恩例寬恤一時未能蘇息
加以天旱不雨五穀未種頭畜牲口損失追盡而軍衛
有司遞運所選集軍餘民壯備守城池地方或借倩車
輜船隻運送軍器物件差役繁重非止一端况即目當
春夏長養之時正物類生育之際所宜對時育物以廣
好生之仁兼且天氣日漸炎熱醺造亦非所宜萬一採
取前來失時恐難食用伏望聖恩乞將前項事務暫且

停緩待秋成以後斟酌整理如此則人物咸得其所而
恩澤益以周流公私兩得其安而事體永爲利便臣叨
受國恩備員輔導苟有所見不敢不言具題景泰元年
三月二十日奉聖旨卿言的是罷不必去欽此

兵部掌部事太子少保兼本部尚書臣于謙題爲乞恩
事臣聞賞罰以示公論爵祿以待有功此古今之通義
也比者強敵入侵逼我京畿欽命臣總督軍務同武清
侯石亨破敵賴宗社有靈皇上洪福軍士奮勇殺退外

敵臣本書生素不知兵既無騎射之能又乏運籌之略
因人成事豈曰有功叨蒙聖恩陞臣少保臣自揆淺薄
上章懇辭恩命下臨未俞所請臣以此時兵事未曾寧
息臣身猶在營壘勉受職命未敢再辭今外敵遠遁人
心向安雖有餘衆流劫爲非見行發兵追勦指日攻克
臣既乏功能難居重任况師保之職上以輔佐天子下
以表儀庶官必才德兼優聲望素著者然後足以當之
豈臣後生晚輩庸陋鄙薄之人所能負荷臣冒昧榮寵

不自揣度其如士大夫清議何其如天下後世公論何
臣又以爲國家之治亂係乎用人之當否用人不當則
衆心不服衆心不服則治功無由而成禍亂無由而弭
矣伏望聖恩憐憫准臣所請乞回少保總督之命仍臣
尚書舊職管理部事誓竭庸駑以圖補報若有違慢罪
甘萬死庶幾上無負於國恩下以協乎輿論臣不勝戰
慄俟命之至

兵部掌部事太子少保兼本部尚書臣于謙題爲乞恩

事欽蒙聖恩陞臣少保兼兵部尚書伏念臣猥以淺薄致位六卿任重才疎已出望外今外敵未靖兵事未寧當聖主憂勤之時正人臣効死之日豈以犬馬微勞遽膺師保重任所有恩命未敢祇受如蒙聖恩憐憫仍臣舊職提督軍馬破敵以圖補報庶協輿論臣不勝恐懼俟命之至

兵部爲擅調官軍事內府抄出奉御黃整等題今蒙差臣等前往永寧守備臣於景泰元年閏正月初一日率

領官軍夜不收一千五百員名到永寧守備外至本月初八日據夜不收飛報聲息有都指揮同知楊信調去官軍三百五十員名本月二十二日又調官軍二百五十員名本城止有官軍九百員名守備不敷本年閏正月二十三日又有叅將楊俊差夜不收齎帖前來永寧調去都指揮王琳帶領馬步官軍盡數前往懷來城內守備將永寧城西門砌塞等因臣竊思先奉勅命專一守備永寧緣係金陵山後未奉勅旨臣難擅離城池具

題該本部官欽奉聖旨該衙門知道欽此欽遵抄出到部案查先該總督軍務少保兼兵部尚書于謙總兵官武清侯石亨昌平侯楊洪會議得懷來永寧一帶內則捍禦居庸外則接連宣府至爲緊要若二城無人守備則一路聲息不通南北道路阻絕非惟外敵得以騁威而京師亦不利便合無令都指揮楊信總領都指揮王琳李剛率領官兵夜不收共三千員名量給賞賜前去懷來永寧二城各安插一千五百員名修理城池築立

墩臺收割田禾預備糧草探報聲息隄備外敵具題節
該欽奉聖旨准他說欽此欽遵今奉御黃整奏稱本月
二十三日右叅將都督僉事楊俊差夜不收齎帖前來
永寧調取都指揮王琳帶領馬步官軍前往懷來城內
守備將永寧城西門砌塞等因叅照前項官軍原係奏
奉欽依調去永寧守備之數皇上特命臣監督其本官
不令揚信預先知會又不與總兵官公同計議奏請定
奪却乃擅出票帖將欽調官軍改調別城又要將永寧

城門砌塞似此方命專權擅作威福下欺主將上侮朝廷視邊務如等閑弄軍馬如兒戲強梁跋扈傍若無人方當軍馬調動之際而敵人乘間夾攻彼此聲勢相懸豈不重爲邊患及照本官先在馬營守備專一弄術舞智驕矜誇大種田貨殖私役官軍才不逾於斗筭心實惡於梟獍蔑視同列交結權貴一旦達鞞臨城不能竭忠死守窺伺敵稍退去輒將馬營獨石數處堅城并倉廩錢糧盡行捐棄在逃以致士卒潰散邊境失守開敵

奔竄之路因而喪師辱國至今人皆痛恨雖伊父楊洪亦嘗憤之切齒今却不洗心改過仰荅皇上委任之重仍復恃權妄爲愈加放肆謂國法不足畏謂軍士不足恤謂剛愎爲可恃謂驕縱爲可久徇私積怨人所共知若不整治於今日無以警戒於後來合將本官提送法司明正典刑以爲邊將棄城專權之戒仍令都指揮楊信將原調懷來永寧守備官軍依數分派二城用心提督操練固守城池遇警相機行事若有應合動調緣由

務要奏請定奪緣楊俊係軍職及奉欽依該衙門知道
事理具題景泰元年正月二十七日奉聖旨楊俊擅自
調弄軍馬致令緊急城池無備這等妄爲論理法難饒
如今外敵聲息緊急防守至重且記他這遭再違了不
饒還行文書與他知道欽此

兵部爲建言事兵科抄出都察院右副都御史羅通題
臣本一介書生永樂六年弱冠之時蒙太宗文皇帝作
養之恩叨中鄉舉永樂十年登名進士授監察御史歷

陞今官臣在仕途年久各處邊情頗知其略譬如近日遼東來報聲息此必徵調遼東軍馬其遼東守將因境外有一二達子行走即便詐稱達靉數千侵邊以止所調之軍甘肅寧夏大同宣府亦然且其遇敵之時殺獲達靉十餘人輒便報說見敵數千殺敗敵衆斬獲首級十餘顆妄奏邀功似此所爲比比皆然不必遠求向者德勝關等門外殺敵功次不知殺得幾百千敵却陞官軍六萬六千有餘萬目所視萬手所指者尚且如此何

況遼塞之遠朝廷所不能見者而不行詐哉比皆已往之事不必追究但方來之計不可不預備也爲今之計宣府大同各宜屯重兵操練宣府合於獨石馬營或德勝口屯練大同或於威遠衛屯練各選武將之驍勇而不怯懦者充總兵官文臣之剛斷果毅而不猶豫者充總督軍務時常遣夜不收諳曉番語者身穿綠衣裝扮達子出境探聽彼情各敵在三百里之內二百里之外則即按孫子兵法出師神乎神乎而不許颺軍之聲微

乎微乎而不許現軍之形或乘月銜枚而行或乘霧捲旗而趨使敵不見灰塵出其不意掩其不備夜擣敵營敵雖恃健馬勁弓卒然而至無所施矣如此則敵可擒而我軍萬全無失矣敵必遠去不敢近邊若止是正正之旗堂堂之陣白日行營敵非惟望塵而遁去抑且埋伏以待我軍其勝負利鈍非臣所敢知也臣之管見如此然古之名將韓信起於行伍穰苴拔於寒微乞勅兵部五軍都督府令都指揮指揮千百戶衛所鎮撫及有

勇略總小旗其中必有知兵如韓信穰苴者可與議而行之若腰橫玉帶頭簪貂蟬者皆是苟全性命保守爵祿之人與憎賢忌能徒能言而不能行者不足與議此也具題本官欽奉聖旨兵部知道欽此欽遵抄出到部叅看得羅通奏稱近日遼東甘肅寧夏大同宣府虛報聲息妄報功次一節照得遼東宣府大同陝西寧夏延綏等處近日飛報聲息絡繹不絕若依所言一槩叅奏不實誠恐邊將果有聲息不行奏報不無有誤事機合

行都察院轉行各該巡按監察御史體勘遼東甘肅寧夏大同宣府總兵鎮守提督叅贊等官近日奏報聲息功次有無虛詐明白徑自回奏定奪其奏德勝關等門外不知殺得幾千百敵却陞官軍六萬六千有餘一節查得近該總兵官武清侯石亨等奏繳前項功次文冊到部通該六萬四百三十一員名本部已經查例議擬覆奏欽蒙將數內當先一萬九千八百八十員名陞一級陣亡三千一百一十八員名陞二級其餘齊力等項

止是給賞不曾陞六萬六千餘名續該兵科掌科給事中覃浩等題稱前項功次不明節該奉欽依都察院便差公正御史一員兵科推公正給事中一員通行查勘他每功績有無曾無陞賞的從實來說不許徇情妨廢公道欽此欽遵通查未報今羅通既稱前項官軍不曾殺敵合將臣謙同石亨等已陞職爵革去其餘官軍合無不必查勘俱且不陞止是給賞惟復仍候御史給事中查勘回奏至日另行定奪伏乞聖裁又奏宣府大同

各宜屯練重兵選驍勇剛斷者充總兵總督官遣夜不收探聽彼情出其不意掩其不備則敵可擒要令知兵都指揮指揮千百戶衛所鎮撫總小旗如韓信穰苴者議而行之若腰橫玉帶頭簪貂蟬者皆是苟全性命保守爵祿之人與憎賢忌能徒能言而不能行者不足與議一節查得先該本部會同戶部并總兵等官石亨楊洪柳溥等議得大同宣府地方自外敵犯邊以來官軍損耗沿邊墩臺壕塹俱被坍塌無人瞭望致使出入自

由縱橫剽掠以致城門終日緊閉不敢放出樵採頭畜
餓死房屋折盡田苗不得割收草束俱各罄盡況今春
農在邇若不設法掃蕩餘衆人心委的不安合無請勅
石亨楊洪各帶精銳馬步官軍四萬員名內步軍三萬
五千馬軍五千石亨自紫荆關往大同楊洪自居庸關
往宣府沿途巡哨就行提督一路守備官軍人等堵塞
關口修理牆柵墩堡及布列營陣暗設詐備敵衆來攻
以計破之敵少以兵勦之若其遠去依舊瞭守遮護彼

處軍餘人等耕種秋收一體防護戶部委官措備糧草
供給候布置停當事體寧帖仍舊回京其餘未盡事件
宜從各官臨事處置務在區畫得宜經久利便等因具
題節該奉聖旨領軍馬巡哨及措置邊務都准議行欽
此除欽遵外緣係已行事理合用總督叅贊官員至期
另行奏請定奪所據推舉武職已有令諭詔書事例其
舉到部者俱送石亨等處試驗量才擢用雖係才略不
齊亦可隨機任用未見有如韓信穰苴者及照武清侯

石亨昌平侯楊洪安遠侯柳溥等頭簪貂蟬與都督孫
鏜范廣衛穎等俱係腰橫玉帶之人亦有守戰功績不
見苟全性命保守爵祿實情俱蒙欽命管操今羅通奏
其不足與議此事又自薦伊仕途年久各處邊情頗知
本官見蒙欽命叅贊楊洪軍務所言如此竊恐有韓信
穰苴堪任大將之才未施於用者合無就令在京五府
六部都察院堂上官將堪任大將之人指實姓名開具
實跡明白奏保仍命內臣同文武大臣博採羣議從公

試驗如果將才過於石亨楊洪等誠如古之韓信穰苴另行奏請定奪不許徇私偏執濫舉非才致誤大事再照羅通所言選文臣之剛斷果敢者充總督軍務官竊念臣謙粗通章句濫廁搢紳既無剛斷果敢之才又乏折衝禦侮之力猥以孱薄魯鈍素不知兵叨蒙聖恩總督軍務揆以輿論委的不堪羅通所言切中臣病乞罷臣少保總督之命或就令羅通或令選老成大臣代臣管理臣止管部事當捐軀盡瘁以報聖恩一有違慢罪

當萬死如此庶使上不有誤軍國之務下以協乎輿論之公緣奉欽依兵部知道事理具題景泰元年正月二十七日奉聖旨著五府六部都察院翰林院堂上官及六科給事中各道御史將于謙羅通所言通行詳看停當來說欽此

兵部爲安民事該太子太保兼戶部尚書金濂題竊照京畿天下之本稼穡衣食之源稼穡足則生民有所依京畿安則天下有所仰且如畿內八府人民舊歲達敵

入侵近者被擄遠者驚散聖慮屢加安撫懷鄉復業者
固有而疑懼流竄者尚多即今春和農事在邇各府民
人棄產業而弗居拋田土而不作逋逃不已州縣空虛
蓋緣保定一帶軍威不振而民無保障之所致也查得
在京并在外操備官員四十萬六千九百二十八員名
月支月糧二十九萬四千八百五十餘石騎操并上直
馬七萬八千六十匹月料豆九萬三千六百七十八石
雖以操練爲名未見禦侮之實况兵以衛民生而民以

供兵食今軍馬之費既皆取給於民民被其害而兵不能保障者是民徒給乎兵而兵不衛乎民也民心之失實由於此及照保定定州河間南北之要衝也真定人民安業者多而募操者衆獨保定地方又被差調官軍經過騷擾臣職專民務豈敢緘默如蒙伏乞勅在廷文武大臣從長計議合無將在京馬步官軍保定量調一萬員名定州河間各調八千員名選任良將統領前去三處操備嚴明號令振揚威武務在上以接應京師下

以安定民志有警則相機用事以衛民生無事則秣馬
勵兵以壯國勢庶使人民觀感復業南畝而耕作不失
其期轉輸得人國用恒足而京畿得以永固矣具題奉
聖旨兵部知道欽此欽遵抄出到部叅照金濂所奏誠
欲經國用以寬民力防外患以固內備所言有理緣三
處操練一節查得保定見有都指揮趙瑄等率領在京
官軍二千員名同大寧都司保定左等五衛官軍舍餘
及保定府所屬民壯人等在彼操守定州見有署都指

揮吳玉率領神武右等衛官軍舍餘及撥在京官軍七百員名同定州民壯人等在彼操守河間見有署都指揮董宸率領瀋陽中屯等三衛官軍舍餘同河間所屬民壯人等在彼操守及照在京各衛營官軍俱係存畱防護京師緊要預備破敵人數况又不時差撥運送軍器糧草等項及調各處關口守備即目又蒙欽命總兵官武清侯石亨都指揮楊信等統領大軍分投出口巡邊而宣府等處近日奏報外敵聲息絡繹不絕京城守

備尤不可緩所據在京見操官軍合無照依金濂所奏
添調保定定州河間三處操備惟復止令保定定州河
間鎮守都指揮趙瑄等及僉都御史祝暹等提督見有
官軍民壯人等如法操練固守城池撫安人民防備奸
宄不許因循苟且怠忽誤事候聲息稍寧另行整理等
因具題景泰元年二月初三日奉聖旨且著真定保定
河間見有官軍民壯操練固守待聲息稍寧整理欽此
兵部爲教習功臣子孫等事刑部右侍郎江淵題伏惟

國家隆古崇德報功之典凡勲臣之家前代既加褒錫
後世子孫得以承襲爵祿或遇蒙任使管理軍務然彼
皆出自膏粱素享富貴惟務安佚不習勞苦賢智者少
荒怠者多當有事之際輒欲委以機務莫不張皇失措
一籌莫展不惟有負朝廷恩遇之隆抑且恐誤天下切
要之事詳其所自皆由平日養成驕惰不學無術之所
致也如蒙准言乞將近年襲替過公侯伯等官及未襲
替其餘子弟各家除與學識正大教官一員專教其習

讀經典武經等書講明君臣父子綱常之道仍隨各營
總兵官日逐操練觀用兵進退奇正之法如此實爲有
資於朝廷任用且使各官皆得展効才力不致坐享厚
祿始終保全與國咸休矣具題奉聖旨兵部看了來說
欽此欽遵抄出到部叅照左侍郎江淵奏稱要將近年
襲替過公侯伯等官及未襲其餘子弟各家除與教官
一員專教習讀經典武經等書仍令隨各營總兵官日
逐操練一節竊詳將臣之任不博於古典無以達事理

之宜不練習於平時無以應倉卒之變比因國家承平
日久將臣子弟往往溺於流俗牽於世好以致卓異者
少庸碌者多茲當多事之秋正宜簡將之日所據公侯
駙馬伯之家雖間有奏討學錄訓導等項在家教書然
其中亦有不曾奏討者合無行移五軍都督府轉行各
該公侯駙馬伯查勘各家若無教官訓誨子弟者令其
徑自具奏吏部查照明白即便簡拔學識正大相應之
人奏請除與專一教習經書開導禮義使知尊卑之分

及公侯駙馬伯持身處事之道并隨住弟男子姪若有
年力精壯堪以操習者俱開報本部日逐赴營隨同總
兵官演練武藝不許宴安怠惰因循度日以負朝廷之
恩以隳父祖之業如此庶禮義之道明而將不乏人騎
射之藝熟而用不誤事緣奉欽依兵部看了來說事理
具題景泰元年二月十九日奉聖旨是欽此

兵部爲邊務事兵科抄出鎮守延安等處都督同知王
禎題景泰元年三月二十一日准協同守備都督僉事

王斌咨節該欽奉勅候春暖河開即將前項州縣寨堡軍民撫恤前去照舊安插守備欽此今據旗軍龍五等狀告蒙臣等鈞帖仍調前去神木縣照舊守備竊思本衛相離神木縣二千餘里路途寫遠供給艱難等因具告除將所告指揮白玉等官軍二百五十員名調守本衛安邊營地方操備及具題外備咨知會准此查得正統十年八月十八日准本府咨該王斌題要將原調綏德地方操守慶陽備冬官軍七百三十六員名連馬匹

軍器退撥與伊分派各守地方等因抄出到部覆奏聞
又於兵科抄出協贊軍務監察御史馬恭題合無將延
綏慶陽沿邊地方榆林莊等二十五寨堡軍馬令王禎
王斌共管遇秋九月十五日以前一遞一年前去安邊
營就領本處官軍備各防禦外敵候到次年二月十五
日以後春暖河開仍來榆林莊一處與臣等計議邊務
行事及不時輪流或分投前去該管營寨整飭軍馬器
械城池壕塹糧料草束庶無分爭事安邊安實爲便益

具題兵部查得先奏奉太上皇帝聖旨是朝廷選任將
官要行協和安邊先著王禎王斌共守地方分投督兵
備敵他怎麼不知以國事爲心節次挾私忿爭今且不
問兵部便差人齎文書與他著依原勅共管延安綏德
慶陽沿邊榆林莊等塞堡軍馬每年防秋時候令王斌
往安邊營操兵防敵春暖仍回榆林莊以安邊境但失
機一體坐罪凡遇邊務須公同計議奏來敢有故違不
遵偏執誤事的不饒還著馬恭與王禎等從公商議果

安邊營見守備官軍不勾調用酌量添撥官軍去兼守
不許妨事欽此欽遵通行王斌馬恭欽遵去後續准本
府咨該臣覆奏會同監察御史馬恭計議得慶陽衛原
調綏德地方備冬指揮白玉等馬隊官軍二百五十六
員係臣原奏隨操之數後因神木縣缺軍調去相兼操
守不動外臣等遵奉欽依內事理將本衛常年調來高
家堡備冬官軍四百八十員名就帶執把軍器火器於
正統十年十月二十日撥去慶陽地方安邊營操備訖

今後若王斌仍再不足偏執攪擾惟事紛爭乞令本官前去所奏迤東易守地方孤山兒府谷東村等三寨協守臣仍前總督安邊等一帶營寨操備往來破敵上無煩瀆聖聽下使邊備得一緣奉欽依還著馬恭王禎從公商議果安邊營見守備官軍不勾調用酌量添撥官軍去兼守事理具題本部官欽奉太上皇帝聖旨既添撥官軍去安邊營操備了罷再生事紛爭的不饒兵部還行文書與王禎王斌每知道欽此欽遵施行外又准

本府咨該王斌又題要將沿邊營寨地方乞勅協贊軍務監察御史馬恭從公酌量寨堡地里分派軍馬等因具題該兵部叅看本部官已奏奉太上皇帝聖旨既添撥官軍去安邊營操備了罷再生事紛爭的不饒兵部還行文書與王禎王斌每知道欽此又通行欽遵去後今王斌又奏前因看得奏內係本年十一月二十二日具題恐前奉欽依公文未到以此本官又行紊煩具奏合咨呈該府轉行臣并王斌馬恭俱照前奉欽依事理

欽遵協和守備不許各執已私故違聖訓生事紛爭有失大體悞事不便備咨又經通行去後今准王斌咨稱除將慶陽衛指揮白玉等二百五十六員名取調迤西安邊營操備一節緣前項官軍係奏定迤東神木縣領馬常川操備人數蓋是各官軍要得附近本衛易得私家往來捨遠就近投托在彼買囑王斌又行妄奏煩瀆聖聽係干累經兵部叅擬奏奉欽依已定年久操守官軍今彼受私擅便調去安邊營自逞已威欺罔朝廷法

度安在查得神木縣都指揮施政即今有操備官軍二千三百八十二員名不敷調用安邊營却有見操官軍三千三百九十員名此紛爭之時又添西安左等三衛并直隸潼關平涼等衛官軍五百員名尚自不足及照都指揮同知神傑在前具奏要將延安衛撥在慶陽地方顯是王斌主使神傑朦朧妄奏當該兵部酌見情弊叅照神傑所奏係干動那邊備官軍未經勘議難便定奪行移臣等查勘回報緣王斌與神傑俱係邊人不顧

廉恥不知大體不思朝廷邊備爲重故將各寨操備軍馬往往攪擾紊亂定規且如慶陽調守甘肅官軍及河南都司南陽潁上衛所并直隸寧山潼關等衛官軍調在延綏地方守邊相離本衛各有三千餘里并二千五百里者却於何處寨堡操守爲當致令神木縣見缺軍馬不敷調用安邊營軍馬愈加數多兩處不均實難操守再照王斌既知奉勅將州縣寨堡軍馬撫恤前去照舊安插守備却將原守神木縣常備馬隊官軍白玉等

擅便調在安邊營有此故違緣延安慶陽一帶邊寨軍馬俱係都御史陳鎰王文靖遠伯王驥等節次整飭邊備已定事理臣係鎮守官員若不具奏誠恐因有廢大事未便竊惟兵部職掌天下軍馬政務日有萬機被其繁文冗亂巧捏妄奏一時不能周知依允准行不惟調動邊軍正中奸邪詭計如蒙伏望皇上明鑑萬方察正除奸乞勅該部叅議施行庶使邊軍安妥邊務不致攪擾民安政舉實爲便益具題該本部官欽奉聖旨該

衙門知道欽此欽遵抄出到部查得先該延安衛操備指揮同知神傑等題先調中寧寨營領延安衛軍馬操備蒙鎮守延慶等處都督同知王禎鈞帖該本官奏准將寧寨安邊定邊三營隨操軍馬暫收慶陽衛地內安插除遵依外續蒙協同守備都督僉事王斌鈞帖開寧寨安邊定邊三營守備并隨操軍馬安邊寧寨二營守備官軍却分撥慶陽城內其慶陽衛在城靖邊營守備官軍却撥延安城內俱不得自守地方誠恐激變下人

從長區畫將慶陽衛隨操并各營守備官舍軍餘令都指揮僉事張友王榮領回慶陽衛操守將延安衛守備寧寨營官舍軍餘八百五十員名令臣等領回延安各守地方若不預先具奏誠恐地方有警兩相推調誤事等因具題抄出本部爲照所奏係干動那備邊官軍未經勘議難便定奪已經轉行王禎王斌馬恭等從長勘議應否將各營守備官軍各回原處其於人情邊務有無違礙明白具由回奏定奪續該都督僉事王斌題稱

都督同知王禎共有官軍一萬五千八百二十五員名
仍隨伊操其餘官軍指揮吳信等一千六百五十二員
名并慶陽衛指揮白玉等官軍二百五十六員名放還
各衛守備誠恐王禎又將放回延慶二衛官軍復調伊
處操備臣領官軍委的寡少若不增添實恐誤事除王
禎放回延慶二衛指揮白玉等所領官軍并各衛召募
壯丁就令守備各處地方外所據延安衛指揮王貴等
官軍四百二十六員名只今仍在綏德王禎處隨操亦

合退回臣處分撥守備爲當等因具題抄出本部又照所奏前項官軍係先議定守邊人數經今年久一旦奏要紛更恐有偏徇窒礙又經行移延綏等處鎮守叅贊等官都督同知王禎等從公計議定奪應否將所奏官軍退回王斌分守地方明白會奏外今王禎又奏前因臣等竊聞兵者國之大事將者人之司命必主將偏裨之協和然後軍務緩急之不誤竊照都督僉事王斌狡詐無狀剛愎不仁叨受國恩而謬膺重寄統領兵馬而

協守邊方自當盡心効力和睦主將以濟邊務以圖成功可也豈期本官非我內地之黨與罔念邊務之重輕素無汗馬之勲勞恣肆虎狼之暴戾自往延綏地方守備以來遽年虛張謬論煩瀆聖聽偏執已見沮壞邊務調弄軍馬有同兒戲欺侮主將視爲尋常先因本官專權方命恣肆妄爲非止一端累該本部叅奏欽蒙恩宥自合刷恥易行改過遷善今却全無忌憚愈肆強梁將奏准調去神木縣禦邊官軍擅自改調安邊營操備既

不奏請於朝廷又不曾咨于主將設使邊務守備率是以行是則賞罰予奪之柄不出朝廷而強梁跋扈之臣得逞其已計其爲後患庸可勝言况本官終係外番黨與難令守備邊方矧當多事之秋宜慎防閑之術合將王斌拏送法司明正典刑以爲邊將專權不忠者之戒或皇上憐念本官守邊微勞寬免刑誅亦合量爲改調勿使終誤大事合無差人馳驛齎文行取本官不必來京就令前去平蠻將軍總兵官靖遠伯王驥處令其領

軍當先勦殺貴州苗賊以贖前罪及令王禎馬恭等共
同計議推薦歷練老成知兵都指揮或指揮一二員奏
請陞授代替王斌守備若是王斌仍前倔强飾詞攪擾
不行隨即前去就便拏問治以重罪如此庶法令得以
歸一邊務不致失誤緣奉欽依該衙門知道事理具題
景泰元年三月二十九日奉聖旨是王禎既累次奏王
斌攪擾邊備難令協守王斌不拏便寫與勅去著做叅
將馳驛往貴州靖遠伯王驥處領軍殺賊還行文書著

王禎同馬恭便從公推選用兵老成熟知邊務都指揮
勝如王斌的一二員奏來代替王斌協同守備即今緊
關用人之際但徇私謬舉致有失誤事機一體重罪不
饒欽此

兵部爲糾劾事嘗謂食祿居官志當存於報國喪師失
律罪難逭於殺身徇曲法以伸恩必長奸而縱惡竊照
前軍都督僉事張軌器非遠大質本凡庸素無汗馬之
勞幸際風雲之會列官資於五府萃恩寵於一門惟知

縱欲以肆非罔顧越理而犯分驕奢淫佚而僭踰之惡
屢彰鹵莽麓疎而統禦之才安在邇者太上皇帝因湖
廣貴州辰沅等處苗賊作耗殺害官民特命本官充左
副總兵前去領兵撫捕乃於正統十四年七月日期不
等與同總兵官都督宮聚率領官軍一萬五千餘人在
於貴州平越等衛地方遇見苗賊對敵本官止憑麓率
並無計謀兼以紀律之不明營陣之無法既不稟命於
主將又不審察於賊情而總督軍務本部尚書靖遠伯

王驥恐其壞事再三戒飭令其嚴整部伍相機行事張
軌倚恃兇暴而執拗不從口出穢言而當衆毀罵縱未
整之士卒犯不測之鋒鏑罔知審勢而度情遂致亂軍
而引戰輕率而前進退失據賊刃未交而甲騎先已遁
去官軍潰散而萬人死於無辜張軌棄甲曳兵徒跣逃
命垂首喪氣莫敢聲言上而玷辱朝廷下而遺笑夷狄
致被王驥將失機情由奏蒙皇上俯垂寬宥未即加誅
欽蒙取回今已到京臣等竊聞賞罰者天下之公論恩

威者天子之大權故賞必及於有功刑必加於有罪然後合上天之心愜衆人之議今照張軌平昔縱欲敗度茲者辱國喪師偃蹇自如素無人臣之節威福恣肆難膺將帥之權服飾僭踰貨利充斥用之於承平之日清議猶恐未然用之於變故之秋大事安得克濟若令再典軍旅必致有誤事機况賞從賤故賞一人而千萬人勸罰從貴故罰一人而千萬人懼以張軌之貴顯驕縱而加以總率兵戎有罪不誅何以示戒合將本官拏送

法司究問明正典刑以爲人臣蹇慢不恭覆軍債事之
戒臣等職典兵政不敢緘默欲於大班糾劾緣張軌係
應議官員具題景泰元年四月初五日奉聖旨罷欽此
兵部爲糾劾事嘗謂竭力盡忠乃人臣之當務懷奸避
事在國法所難容竊照寧遠伯任禮本以庸流叨居重
任所宜感激奮勵不避艱危用竭犬馬之勞以圖涓埃
之報可也今本官外示退遜而中藏詐謀身躋顯榮而
心無補報膏粱紈綺縱嗜欲以爲能介冑干戈咸捨置

而不問先年甘肅鎮守惟務營私利已不能禦侮安邊
窺見邊務方殷遂乃上章辭職既蒙取回赴京自合辭
祿致仕却又不安本分望外希求計囑昌平侯楊洪奏
保伊曾經戰陣精神未邁乞令管軍以備調用已蒙欽
准本官令在三千營同楊洪操練軍馬並無寸長可稱
亦無一策可措近該本部照得紫荆白羊倒馬關口等
處易州涿州保定真定通州係屏蔽京師緊關衝要去
處合當增兵守備遣將巡督議擬摘撥官軍委官統領

前去臣等爲見任禮係先朝舊臣邊陲宿將若是簡拔
任用必能宣力竭忠豈徒望其禦侮折衝而實賴其發
蹤指示乞請勅命本官統兵於前項地方關口內外往
來巡守已於本年四月二十六日奏准行令任禮欽遵
去後豈期任禮罔顧人臣之義終懷負國之心奏稱年
老不堪領軍竊詳任禮先該楊洪薦伊在京管操軍馬
欣然就事略無難色及致擬差前去畿甸巡守輒稱老
病不肯啓行臣等竊惟周之姜尚八十而佐武王滅紂

興周漢之趙充國七十餘而請自將屯田以降先零今
任禮年齒無姜尚充國之邁又况各關各城去京不遠
當此人心搖惑之際國步艱難之時本官一身体戚實
與國家共之今却不思忘身而濟難乃敢方命而辜恩
原心實出於奸謀論罪當加於極典及照楊洪明知任
禮倚老推奸不肯盡心爲國意在擅作威福暗邀人心
聽從囑托朦朧薦舉夫以任禮楊洪俱爲大臣受恩深
重手握兵柄身倚安危方且欺心玩法退縮顧望若此

將何以爲羣臣之表率朝廷之倚賴哉合將各官通行
拏送法司究問治以重罪以爲人臣懷奸不忠欺上方
命者之戒緣任禮楊洪俱係應議官員具題景泰元年
四月三十日奉聖旨楊洪任禮都不問任禮既告老罷
不差也不用他管軍馬著在閒養老通州直抵真定地
方隔遠誠恐有警一人率難提調恁再計議選差二員
分管提調欽此

兵部爲糾劾事嘗謂臣子以忠孝爲先而不忠不孝者

天討所不宥將帥以威福爲戒而作威作福者國法所難容竊照右都督楊俊猥以淺薄遭際盛明以分寸之微勞受一品之重任驕蹇暴虐知有已而不知有人奢縱貪婪知爲身而不知爲國待偏裨若奴隸視人命如草芥近該伊父昌平侯楊洪奏稱楊俊歷官都督命爲叅將自幼無知處貴已極且其性資麓率言語輕躁致爲衆人之所擠排士夫之所非議非惟長惡不悛必誤邊事抑恐終陷刑憲不能保全乞將楊俊取赴京師隨

營日逐操練欽蒙聖恩取回即今本官見在臣等竊惟
褒賞有功誅罰有罪此國家之常典亦天下之公論今
楊俊叨蒙聖恩忝居重任不能修德以効忠却乃縱情
而肆虐先在獨石馬營等處守備專一弄術舞智假公
營私蔑視同列交結權貴及遇達靼臨城不能効力死
戰輒將獨石馬營等處堅城并倉廩錢糧盡行捐棄在
逃以致士卒潰散城池失守開敵奔竄之路因而辱國
喪師貽禍患於無窮致令人皆痛恨後充宣府叅將率

領馬步官軍在於懷來等處巡哨不候計議奏請擅出批票將欽調永寧守備官軍要調懷來守備又將永寧城門砌塞該守備永寧奉御黃整等奏發本部已將本官方命專權擅作威福緣由叅擬覆奏欽蒙恩宥却乃不行改過愈肆非爲悻悻而抱不平揚揚以爲自得略無顧忌益肆驕矜凌辱守臣欺蔑主將又將都指揮陶忠無故拷打凌辱身死今伊父楊洪恐其敗壞邊務終陷刑辟具奏取回竊照楊俊既不能盡忠於國又不能

盡孝於親喪地棄城而謀勇之略安在恃恩玩法而人臣之節全無懷挾私讐打死人命衆心因之而不附邊務由是而廢弛誠國法之所難容人神之所共怒若不明正其罪無以警戒將來合將本官拏送法司究問明正典刑庶爲後人之戒而愜士論之公緣楊俊係軍職具題景泰元年五月初二日奉聖旨楊俊拏了三法司門前問楊洪罷欽此

兵部爲軍務事兵科抄出協同守備延安綏德慶陽等

處地方後軍都督府都督僉事王斌題節該欽奉勅茲者貴州等處苗賊劫掠鄉村攻圍城池雖已累調官軍征進而賊衆大肆猖獗爲患不已今以爾在邊方年久熟於戰陣特命充左叅將就彼星夜前往貴州地方協同總兵官靖遠伯王驥等率領官軍勦殺前賊爾見管協同守備一應文書并軍馬文書姓名數目悉交付僉都御史馬泰收掌爾即起程毋致稽遲欽此欽遵外竊照彼處相離貴州路程寫遠水陸道途亦有不通之處

及臣披衣甲軍器并自備戰馬獨身遠馳無人跟隨路
途艱難除帶領原隨操軍舍鄭玉等六名沿途應付陸
路脚力人夫水路站船口糧於本年四月二十六日起
程前到貴州仍令各軍舍回操今將帶去軍舍名數開
坐具題准王斌手本開稱前項帶去軍舍鄭玉等六名
等因查得鄭玉等俱係領馬邊操征調人數未經與臣
等計議緣路途遙遠急不得回往復中途恐有違礙未
便今既預已帶去理合具題該本部官俱欽奉聖旨兵

部知道欽此欽遵通抄到部竊詳軍舍所以守禦邊城
驛傳所以傳宣上命若無明文豈敢擅用今都督僉事
王斌非奉朝廷明文又不與本處鎮守協贊等官計議
擅將邊衛見操軍舍鄭玉等六名應付脚力站馬船隻
口糧私自帶去似此違法合當行提問罪但即目貴州
賊情緊急本官已是起程前去若便推問誠恐缺官領
軍殺賊合無姑記其罪行移鎮守延綏等處都督同知
王禎差人跟趕鄭玉等回衛操備及行王斌著令將鄭

王等照名發回不許私怯仍要當先殺賊建功以贖專權之罪若有怠忽治以重罪緣奉欽依兵部知道事理具題景泰元年五月初八日奉聖旨是欽此

兵部爲軍務事照得先因湖廣貴州苗賊生發欽差總兵官統領本處量調雲南四川南京等處官軍及山東東昌德州河間達官人等前去勦殺續該巡按貴州監察御史黃鎬等題稱彼處苗賊猖獗圍困城池要乞添調官軍協助殺賊等因本部已經議擬具奏請勅署郎中

事主事王高起調江南安慶九江福建宣州等衛官軍
一二萬送赴貴州總兵官保定伯梁瑤處交割調用近
該總督軍務本部左侍郎侯璉等題督同副總兵等官
都督方英田禮等領軍已解龍里新添平越清平興隆
都勻等處城池圍困開通雲南直抵湖廣道路本部又
經議擬具奏欽蒙將侯璉等陞尚書方英田禮陞都督
令將未盡賊寇務在勦捕盡絕及查署郎中事主事王
高所調官軍止是鎮江一衛軍餘八百七十員名於本

年六月十三日起程其餘衛分官軍未見奏有起程日期并調過數目臣竊詳治國之道必居重以馭輕禦侮之術必安內而攘外今照南京爲國家根本之地東南總會之所守備不可不嚴士馬不可不增况比先已調官軍達軍人等一千二十員名前去貴州殺賊而近日南京災異尤甚苦雨連綿江河泛溢城池坍塌人畜漂沒夫災異之來其應不虛上天告戒亦所當慮今南京所操官軍其數不多况當天氣盛暑之時軍士遠投瘴

鷹之地亦非所宜兼且貴州賊勢已漸平妥道路日漸
開通若不從長區畫先事而慮將附近南京衛所官軍
一槩起調前去非惟南京有警缺人調用抑且軍士疲
勞徒爲往復合無差人馳驛齎文與署郎中王高同巡
按直隸監察御史令將原擬調軍衛分除已到貴州外
其未曾起程到彼之數俱送南京守備豐城侯李賢等
處交割兼同原有官軍操守城池以備不虞就令王高
通行具數回奏仍行總兵官保定伯梁瑤等嚴督原有

官軍會合總督軍務等官尚書侯璉等搜捕餘寇務要
日下殄滅如果官軍調遣不敷應合添調星馳差使具
奏另行定奪不許指以軍少爲由退縮不進以致長寇
殃民自取罪愆不便緣係改調官軍守備京城事理具
題景泰元年六月二十四日奉聖旨是欽此

兵部爲軍務事照得先該本部議得山東東昌府臨清
縣係是水陸衝要又有閘埧數多以便船隻往來并收
受各處僭運糧儲軍國之需不可不築立城郭防範奸

碩已經奏准差平江侯陳豫副都御史孫曰良前去本處鎮守地方相度地勢築立城堡續該孫曰良并山東三司等官奏稱百姓艱難不曾修築近又該鎮守真定右僉都御史陸矩題稱訪得民間傳言達鞞差人來寧晉泊內踏看水草要去臨清搶擄截路合於臨清設法併工修築城池等因本部又經議奏行移陳豫孫曰良并巡撫山東副都御史洪英會同山東都布按三司堂上官并巡按監察御史公同勘議如果相應築立城池

其合用人工物料或官爲措辦或自行設法於何時起
手扣至何時得完星馳具奏一向因循未曾回報今照
口外宣府懷來及山西蔚州并白羊紫荆關口總兵守
備官員節奏達靛大舉入侵聲息緊急等因除另行議
奏隄備外臣等竊聞居安慮危有備無患此古今通論
又兵法曰用兵之道無恃其不來恃吾有以待之設若
外寇萬一似前深入知我京師有備不敢來侵徑往臨
清剽掠緣此處既無城池保障則軍民難於安插以守

則不能固以戰則難取勝其見收倉糧動經十數餘萬
又有四方客商人等以及公私物貨等件其數不少皆所
以屯給京師之用度下通四方之貿易兼且裏河一帶
水陸經行臨清開渠尤爲緊要倘或守備不固被敵坍
掘非惟水路之阻塞不通抑且朝廷之供給不繼其爲
患害庸可勝言又况臨清等處地震晦冥此乃兵象上
天告戒厥應不虛及外敵要搶臨清之說雖是未可深
信然亦不可不備合無請勅鎮守臨清平江侯陳豫副

都御史孫曰良洪英并山東都布按三司堂上官及巡按監察御史務要各人親詣臨清地方照依原今事理從長計議或量爲設法起倩彼處居住軍民人等措辦物料修築城堡以安軍民以護糧儲以守閘埧其或別有長策可以速於成功可以保護人糧不致重爲民擾亦要明白開奏不許視爲泛常互相推調及轉委屬官勘議虛文延調月日以致臨期失誤守備自取重罪不便緣係地方重事具題景泰元年六月二十四日奉聖

旨是欽此

兵部爲軍務事伏覩景泰元年八月十九日節該欽奉詔書各處運糧官軍先因外敵侵逼暫令操守令民代運今後悉令照舊運糧以甦民力欽此除欽遵外查得在京五軍三千神機等營府軍并前錦衣武驤左等衛所報到景泰元年七月分馬隊官軍實有三十四萬八百員名除公差紫荆關等處修守并運糧草牧放馬匹及輪流上直披明甲管糧識字等項共一十九萬八百

六十一員名見在止有一十四萬九千九百四十員名
今照前項實有官軍於內約有五萬七千之上係原運
存畱在京操備之數中間多有見撥遠方運送糧草及
各關守備緣京師實爲天下之根本即目外敵雖已請
和其反覆無定之心未易測度不可不爲隄備若將運
糧官軍盡數疎放又要在京撥軍前去邊關等處兌替
不無京營見操官軍愈加數少臣等竊惟事貴因時而
制宜兵貴有備而無患食固王政之所先兵實國家之

重務運糧乃民之常事操備爲軍之正役撥軍運糧是乃權宜之術而非經久之道大抵民以給軍軍以衛民此古今之通論也今議得江南官軍善於水路駕使船隻江北官軍善於陸路騎馬騁射况江南糧多原係軍士攢運江北糧少多係百姓自運合無因時制宜先事而慮將在京原畱運糧官軍若係江南蘇州鎮江南京各衛并九江湖廣都司黃州等衛不問見在各營并守關等項悉照今奉詔書事理疎放回還原籍運糧其江

北揚州鳳陽廬州六安淮安等處及山東等都司所屬
并直隸天津等衛所官軍仍畱在京操備聽候警急調
用其所屬糧儲令戶部照舊暫令民人僭運候一二年
間邊務十分寧貼將各官軍發回僭運糧儲惟復不分
南北遠近一槩放回運糧未敢擅便定奪具題景泰元
年八月二十一日奉聖旨是江南衛所官軍放回照舊
運糧江北衛所官軍且暫畱在京操練待寧息定奪欽
此

兵部爲軍務事伏覩景泰元年八月十九日節該欽奉詔書各處運糧官軍先因外敵侵逼暫令操守今後悉令照舊運糧以甦民力欽此除欽遵外今照浙江江西湖廣三都司所屬衛所運糧官軍先因各處賊盜生發缺軍調遣中間多有調去勦捕賊寇其所運米糧戶部差官量起人夫僭運近該湖廣等處總兵官保定伯梁瑤等并廣東都布按三司及福建鎮江浙江等處侍郎薛希璉副都御史軒輓等節奏彼處賊寇依前聚衆殺

害軍民剽掠人畜未曾寧息若將各處原調殺賊運糧
官軍一槩疎放運糧其各項賊徒雖有欽奉詔書事例
令所在鎮守三司御史等官撫令投順宥其本罪誠恐
此等賊徒自知罪惡稔盈不肯草心向化依前糾衆剽
掠而運糧官軍已是疎放若再重複起調不無緩不及
事往復又難且糧餉固所當急而賊情亦不可緩合無
差人馳驛齎文與湖廣總兵官保定伯梁瑤鎮守浙江
副都御史軒輓鎮守福建侍郎薛希璉廣東殺賊副總

兵右都督董興巡撫江西侍郎楊寧等令將原調殺賊
運糧官軍照舊存畱各處兼同民壯人等將各處未平
賊寇務在設法作急撫捕盡絕將運糧官軍就便放回
不許遷延歲月兩相妨誤其各官軍所運糧米仍令戶
部斟酌定奪緣係處置軍務事理具題景泰元年八月
二十三日奉聖旨是欽此

兵部爲軍務事照得先該武清侯石亨題稱要將在京
達官家下弟男子姪等項有熟弓馬者許自置鞍馬當

先破敵無鞍者官給有不報者許該管知識人等舉保等因具題會議得合令石亨設法招募每人賞銀十兩月支口糧五斗跟隨石亨操練破敵有功照例陞賞節該奏奉聖旨是欽此欽遵續該兵部及兵科都給事中葉盛等題稱在京軍職官員之家多有弟男子姪空閒在家其中有素習弓馬不待操練者有懶惰好閒甘於游蕩者一家多或五七人少不下三四人括而盡之可得萬數乞通行取勘從實開報并行五城兵馬排門挨

究陸續送營操練等因具題本部議擬即目正係緊關用人之際合無准擬行令在京各府衛所挨查前項弟男子姪等項并陞調出外遺下弟男子姪家人除顯跡不堪操備外其餘空閒年力精壯者盡行著落親管官旗取勘送部轉送五軍營總督總兵官處立營操習武藝每名月支口糧三斗及行五城兵馬司著落鄰佑人等挨究等因具題奉聖旨是欽此除欽遵外今查前項達官家下弟男子姪經今日久並無招募到官顯是武

清侯石亨空言無實徒爲文具及照在京各衛并五城兵馬經該官吏明知都給事中葉盛等具奏本部議擬奏准取勘却乃互相朦蔽不以軍務爲重不行盡數報出查得各衛見報到弟男子姪止有九百二十名除送營操練外中間有全不開報者有止報委官職名而無人送部者及照在京通該七十六衛所額設管事官員每衛額設指揮千百戶衛所鎮撫該八十餘員又有多餘帶俸官員每衛多者至二三千員少者三五百員或

三五十員通計不下萬餘若以家下人丁計之奚啻數萬如遇承襲職事其無親老者有將堂兄堂弟人等保送襲替及致選要堪操之人通不及一千之數臣等竊聞兵戎者國家大事所以防奸而禦侮也京師實爲天下之本不可不廣爲增添士卒精於訓練教閱近年以來武備懈弛人無警懼以致平居無簡練之方臨敵無制勝之效茲者恭遇皇上運起中興畱意武備臣等猥以庸才謬典兵政竊以邊陲之警雖已請和而變詐之

態終難測度况思患預防聖經之訓忘戰必危兵韜所
戒若不維新法制一洗往日之陋將何以禦侮防奸期
收方來之效以雪前日之恥乎欲行武清侯石亨命將
先前所奏在京達官家下弟男子姪多方設法招募務
求實效毋事虛文其招募到營之人按月具數開報本
部照例定奪糧餉及通行在京各府衛所從實取勘聚
衛官軍其應襲弟男子姪叔伯甥壻家人等項及陞調
出外官遺下成丁男子俱要見數清出令當該官吏開

具總數并不致隱瞞緣由定限本年九月二十日以裏
徑自具奏仍備開年歲姓名數目造冊并不致扶同重
甘結狀連人送部斟酌選揀堪中者送營操備不堪者
退回生理幫貼軍裝不許增減年歲隱瞞不行造報或
挨究得出或被人告發家長送法司問罪所隱之人發
京衛充軍及日後保送承襲職事冊內查無姓名者不
准承襲仍行錦衣衛分差的當官員與同五城兵馬嚴
督各該地方鄰佑人等排門挨究若有通同隱瞞事發

該城兵馬司官吏人等一體治罪如此庶使人知警懼
操備得人緣係處置軍務事理具題景泰九年八月二
十四日奉聖旨是欽此

兵部爲軍務事臣等竊聞兵戎者國之大事所以防奸
而禦侮弭盜而安民古之聖帝明王雖當國家治平之
時其於武備未嘗不畱意整飭近年以來因雲南麓川
賊首叛逆朝廷特命大將統兵征戰繼而福建浙江湖
廣貴州兩廣賊盜相扇而起所在用兵捕勦近因迤北

外敵也先等糾衆深入以致在京在外衛所官軍中間
征傷陣亡事故數多雖以各處招募義勇并僉點民壯
人等協同官軍操習緣此等之人生長田間不諳戰鬥
止可充數守備難以克敵成功緩急之間誠恐誤事况
今也先等自知違天背好改過遷善遣使赴京朝貢請
和而南方賊寇多已殺獲是皆皇上聖德神功所致以
啓中興太平之治實兆於此臣等謬以菲才叨掌兵政
竊以爲今日之事正當作新士氣嚴飭武備思患預防

以收方來之效勵兵講武以雪前日之恥為宗社萬萬
年之計近差監察御史前往各處清理軍政所有合行
兵備事件理合逐一議擬開坐謹題請旨

計開

一查得正統七年間該本部奏准令在京在外各該衛
所將官軍隨營舍人餘丁逐一取勘造冊送部備照遇
有警急官軍調遣不敷令其相兼守城經今年久多有
少者長壯及新生續有之數俱各不曾開報中間亦有

奸詐之徒懼怕餘丁差役隱占不行報官近該本部議奏令該衛所挨究空閑餘丁等項撥補陣亡官軍操備往往不能足數因是前項造到文冊年久難以考究合無在京行移各衛所令掌印首領官吏將緊有旗軍隨營餘丁并見任帶俸官員伯叔不分弟男子姪女婿義男大小口數公差見在備開年歲姓名總數定限本年十一月終徑自開奏仍造備細文冊具不扶重甘保結繳部外請勅差去各處清軍監察御史如無清軍御史

去處請勅巡按監察御史公同布按二司清軍官員督
同都司衛所經該官吏逐一取勘明白先將總數類奏
仍著落各該衛所備細造冊具給依限差人北直隸大寧
萬全遼東山西行都司俱限次年正月終山西河南山東
江北直隸中都留守司俱限次年二月終江南直隸南京
各衛浙江江西都司俱限次年三月終湖廣陝西福建
行都二司俱限次年四月終四川行都司陝西行都司
俱限次年五月終廣東廣西雲南貴州俱次年六月終

到部如有過限不行造報照依歲報官軍馬騾文冊事例先將差來人員送戶部納米經該官吏取招送部位俸吏典照卷查問其有查勘不明隱瞞增減年歲或查究得出或被人告發家長與造冊官吏通提問罪所隱之人另發附近衛所充軍前項文冊各該御史務要親臨提督嚴加取勘造繳不許視為虛文有妨軍政

一照得在京在外各該衛所官軍戶下多餘人等比先年間有例除存留幫貼正軍外其餘俱於附近有司寄

籍納糧當差其意蓋欲人無游惰糧無侵欺奈何中間有等奸詐之徒一家或三五人十餘人止用三人寄籍有司其餘俱各隱蔽在家不當差役衛所拘役執稱寄籍有司有司拘役即稱上冊軍伍及至正軍缺役買贖該管官吏朦朧造冊原籍清勾似此兩相影射籍貫不明年久愈難查考茲當緊急用人之際民間精壯人丁多已僉作民壯相兼官軍操習而前項附籍之人原係軍中生長人數却容附籍有司影射軍役實是輕重不

倫事體未便合無在京行移各衛所并大興宛平二縣
在外請勅清軍御史如無清軍御史去處請勅巡按監
察御史著落都司衛所司府州縣經該官吏從實查勘
但有比先年間官吏戶下多餘人丁於有司附籍者不
分年歲久近除該納糧草仍於有司上納人丁盡數撥
回軍衛相兼官軍操守城池若有起調征進等項此等
退出餘丁存留守城不許調動其各有司不許占愆不
發有誤兵備仍令各該巡按清軍御史將退出餘丁類

總作急具奏另造文冊一本送部備照

一照得近因蒙古侵遼東宣府大同并山西北直隸軍
衛有司各該官員軍民人等多有驚疑逃移或於原籍或
四散赴食潛住者本部雖議奏榜文事例各處張掛許令
自首原免本罪各還職役寧家緣今人心搖惑未定多有
未曾首出誠恐在外日久畏懼罪累或為饑寒所逼結聚
為非不可不防微杜漸合無請勅各處清軍巡按監察御
史著落司府州縣并巡檢司等衙門官吏嚴加省令地鄰

人等排門粉壁逐一挨究但有先前被敵驚疑官員軍民人等逃來潛住許令赴所在官司具首一體免罪量給口糧差人管赴合干上司轉送原衛原籍官司各還職役寧家如文書到後過遲一月之上不行首送者許諸人擒拏送所在官司審實牢固枷釘解發其各該御司及司府州縣官員務要寬猛得宜撫綏有方俾人無失所不許縱容下人恣意虐害以致激變果有豪右人戶將此等逃來軍民人等占隱在家不聽復業者事發治以重罪

一先該本部尚書張本奏准頒行軍政條例各該府州縣衛所遵守施行經今年久前項條例多有視常奉行未至況今邊務方殷緊要用人之際若不通行申明誠恐因循既久愈加懈怠合無請勅差去各處清軍御史并各該都布按三司及直隸府州縣衛所清軍及軍政官員如遇清解軍丁務要照依軍政條例施行不許故違以弛兵政景泰元年九月初一日奉聖旨是軍政之事時常清理方得人用今既年久未曾整理如今在外見有御

史等官在內各衛所亦差御史給事中一發清理務
要原伍不缺餘丁數有清切易為調用欽此

兵部為刻奏事刑科抄叅謀軍務事左都御史沈固題
景泰元年八月二十四日鎮守太監陳公總兵官定襄
伯郭登右叅將都指揮潘興等同臣等俱至本衙門公
同查比今年四月二十三日東門破敵官軍功次間有
太監陳公同內官馬慶姓馬祥言罔談彼短怎麼說又
言劉定保這尖嘴比先在京裏捏造諸人是非專要害

人他要出境燒荒今番却好著他去又引汝爲君子儒
無爲小人儒攻其惡無攻人之惡等語諄諄不已其意
專爲議刺在坐者當有郭登稱言且整理公事閒言語
不必多說不期陳公變色發怒唱言我到此十箇月何
嘗敢違理法生事害人你却唆使都司官排陷我奏藁
尚在你處等詞郭登遂喚都司都指揮僉事姚貴等對
衆駁問因而互發醜言兩相爭鬪其都指揮姚貴等亦
各辭色不遜出語抵觸人衆傍瞻甚失體統當得內官

馬慶阮阿山等勸解各散臣竊見太監陳公定襄伯郭
登自從共事以來心不相孚意不相睦凡諸行事各有
短長每有退後之言恐壞當行之事甚至聚會言不相
讓面不相同故兵法曰兵貴和合則一心用則無疑又
曰師克在和今各官奉命守備同舟共載動輒矛盾何
以克濟況即今民物凋敝邊務未甚寧輯若不改圖終
恐誤事乞勅該部計議合無於內調取一員別用另差
一員前來鎮守操軍撫民固守邊城則所在有司瞻仰

臣亦得免失職之咎具題該都察院官欽奉聖旨大同
係極邊緊要城池鎮守總兵正當協和以防不虞陳公
郭登怎麼互相矛盾恐誤邊備兵部都察院將他每訐
奏事情逐一詳看計議處置停當來說欽此欽遵抄出
又該鎮守太監陳公題奉勅鎮守大同見得總兵官定
襄伯郭登職居主將兼以讀書明理大小事務不敢擅
行預先啓稟本官方以施行不期本官逞已聰明執已
偏見全不通臣商和一切事務公然擅行每令家人回

京於內外衙門逢人唱說臣與總兵不和主使自保都
指揮僉事姚貴張瑤等排陷告臣及訪得山西行都司
都指揮僉事姚貴等聽令郭登主使排陷奏臣私役軍
人侵剋抄沒太監郭敬家財科歛銀兩金箔顏料入己
等因意在逐臣回朝報復前讐實是不甘將各官捏告
臣事件開坐具題又該陳公題臣自到彼經年累月外
敵縱橫四野剽掠軍士辛苦萬端豈敢害一軍民今姚
貴等奏臣蓋因平昔與總兵官定襄伯郭登不和各官

俱係本官比先奏保官員不知奏臣幾事不敢伸訴待
候明文另行分豁今將姚貴等不法事情逐一開坐乞
差公正廉幹官員前來體臣仍將姚貴等追究主使寫
本之人等因具題又該陳公題稱景泰元年八月二十
四日有都御史沈固會臣到衙門與同總兵官郭登內
官馬慶等眼同開看原封東門出戰有功官員花名數
目比對查得數內一名劉定保原封數內有名續報無
名是臣說稱原是臣處辦事寫字因差赴京奏事本人

奏要燒荒報効後有勘合到於總兵官處聽調不知有何事因將本人決打六十發去常川瞭墩去訖因此無人與他報功是臣聞說這廝已前好來只爲尖嘴害了自身總兵官不知何情就使用言惡罵唱叫衆都指揮在那裏有都指揮齊聲叫應張瑀李英盛廣姚貴林盛等一齊向前用言佐使發鬧是臣見得郭登兇惡手下人衆只得迴避走回等因具題又該大同府知府霍瑄亦題陳公郭登不和竊照大同殘敝至甚軍民流移十

去八九即日邊境稍寧鎮守總兵官今乃不相和諧似
難相處奏乞計議定奪等因具題欽奉聖旨都察院知
道欽此欽遵查得先於刑科抄出山西行都司都指揮
姚貴等奏有鎮守太監陳公節次科派金箔顏料木植
等物私役軍士辦納月錢出境採捕被番將官軍殺死
侵欺犯人郭敬家財等件奪要官軍搶回敵馬縱容家
人強奪良家妻室爲妾使令伴當開張店房邀接客商
侵奪民利占用屠戶菜戶日逐供納下飯菜蔬等因乞

將陳公提取赴京明正其罪具題奉聖旨都察院行文書與鎮守巡撫等官逐一體勘明白奏來定奪欽此欽遵已行體勘去後今抄前因會官議得陳公所奏總兵官定襄伯郭登都指揮姚貴張瑤李英盛廣畢英王全李俊林盛不法事情及陳公自行分豁辯明冤枉事件中間皆係一面之詞俱未委虛的又有犯在革前難以追究者况姚貴等奏陳公前項違法事情先已行移鎮守巡撫等官體勘未報難以處置除總兵等官定襄伯

郭登係陳公奏內干涉官員難令體勘外合無將姚貴
陳公等先後奏詞逐一抄寫行移巡按監察御史并山
西都布按三司各委公正堂上官員親詣大同公同將
各官訐奏事情逐一體勘除草前外若有犯在草後及
事須改正追究者就便從公改正追究明白若有干問
人犯就便提問如礙軍職及郭登陳公等明白通行奏
請定奪不許徇私偏向以致事枉人冤亦不許推托干
繫遷延不即奏報及照陳公係近侍內臣郭登係總兵

官重任俱各欽奉上命鎮守邊方當國家多事之秋邊務方殷之日所宜同寅協恭以副朝廷委託之重一乃心力以爲邊城保障之計可也豈期各官各逞己私互相猜忌惟執一己之見全無爲國之心乃者當公廳議事之時正羣僚聚會之際無一言及於軍士艱難無一語及於邊方利害却乃各發醜語極力擠排非惟有失衆人之觀瞻抑且蔑視朝廷之綱紀且兵法云不和於軍不可以出陣不可以決勝今邊庭雖已請和而奸詐

未易測度大同實當衝要而守將必慎其選各官平居無事尚且矛盾忿爭借使遇敵出兵豈肯互相應援失誤軍機事勢之所必然合無將郭登陳公內取回一員另行差官前去更替庶使事體歸一而下人易於遵承彼此協和而邊務不致失誤緣節奉欽依兵部都察院將他每訐奏事情逐一詳看計議處置停當來說事理今將陳公節次訐奏事件開坐具題景泰元年九月初九日奉聖旨便寫勅與左監丞馬慶鎮守右少監阮阿

山守祉鉤與同郭登協和行事還寫勅與郭登知道陳公著回京欽此

兵部爲糾劾事嘗謂竭盡忠誠乃人臣之常分交通外敵在國法所必誅竊照都督僉事毛忠本以累囚薦沐寵恩累官至五府之榮叅將受一方之託自合精白一心以圖補報可也豈期本官挾詐懷奸欺心負國當外敵縱橫之際正邊方多事之秋却乃潛蓄異謀陰圖不軌近因喜寧之謀逆敗露明正典刑自揆朝廷之天討

不容遂懷疑二乃陳情而自釋蒙恩典以宏敷既不加
誅復官其子冀以感恩思報庶幾改過自新然天地之
量固無不涵容而豺狼之性終難於馴伏邇者禮部侍
郎李實出使迤北回還說稱本官曾遣人到於也先等
處傳遞言語意在約爲內應引敵襲我邊城敢負更生
之恩自造滅門之禍奸謀未遂形迹已彰是皆上天默
佑聖明鬼神陰誅叛亂是以逆臣就縛而邊境獲安也
臣等竊惟大易謹履霜之戒春秋慎無將之誅若不明

正典刑實無以謝天下合將本官拏送法司究問明白
碎屍萬段以昭法令之公以爲後人之戒緣係應議官
員未敢擅便謹具奏聞伏候勅旨景泰元年九月二十
八日奉聖旨恁每說的是這是傳說言語未知虛實他
在邊年久多効勤勞且饒他這遭放了欽此

忠肅集卷七